

7.462

SUBT

INVT

SG


SG


SG


Y

4.098

RESER







y. 4098.

~~Z. 309.~~

M/62

LA
PREMIERE PAR-
TIE DES SVBTILES,
ET PLAISANTES
INVENTIONS.

*Contenant plusieurs ieux de recreation, & traitts de souplesse,
par le discours desquels, les impostures des Bâteleurs sont
descouvertes. Composé par I. Preuost,
natif de Tolose.*

A Monsieur Durand de Gestes, Escuyer,
Seigneur de Vernose.




A LYON,
Par Antoine Bastide marchand Libraire.

1584.



Par Antoine Bachevalier Libraire

1784



A MONSIEVR
 DV RAND DE GESTES,
 ESCVYER, SEIGNEVR
 de Vernose. S.

MONSIEVR, vous pourrez possible treuuer estrange, que n'ayant encore iusqu'icy rencontré tāt de bon-heur, d'auoir vostre cognoissance plus priuée, ny autre, que celle seulement, qui rend vostre nom illustre, & recommandé en l'endroit d'un chacun, i'aye prins la hardiesse de vous offrir un'œuvre, si peu sortable à voz merites, que ceste-cy. Et certes, Monsieur, il faut que ie confesse, (selon que la vertu a cela de propre, de se faire aymer, & rechercher,) qu'ayant d'assez longue main, nourry en mon cœur, un desir extreme, de m'aquerir quelque fauorable accès vers vous, pour iouyr pleinement du fruiēt de tant de belles vertus, qui vous sont tellement familiares,

Et comme naturelles, qu'il semble que le Ciel vous
 les gardast en reserve, à vostre naissance, ainsi qu'
 une riche estreine: i' auois tousiours pensé, de vous of-
 frir cest eschantillon de mes labeurs, dès le premier
 iour que ie l'entreprins. Mais quoy? autant de fois
 que ie faisois comparaison à part-moy, du present, à
 celuy auquel ie le dediois, voyant la monstrueuse in-
 égalité, Et rapport qu'il y-a de l'un à l'autre, Et
 que ceste œuvre là, seroit seule digne de vous, qui se-
 roit toute bastie, Et coufue de voz louanges: autant
 de fois ie demeuroid non seulement perplex, Et irre-
 solu en mon dessein, mais encore du tout ébranlé en
 iceluy. Car d'un costé se presentoit à moy, ceste pru-
 dence, Et meureté de iugement, qui vous ont na-
 guere mis en la main un des gouuernals de ceste Re-
 publique: maintenāt ceste honnesteste grauité, Et mo-
 destie, qui vous rendent ayiné, Et respecté tout-en-
 semble, puis aussi ceste dexterité, Et singuliere vira-
 cité d'esprit, qui me sembloit ternir, Et effacer tout le
 lustre, de tout le plus subtil qui pourroit estre en ces
 miennes subtilitez. Toutesfois, m'estant encore pro-
 posé vostre douceur, courtoisie, Et debonnaireté, telle

qu'on la void à descouvert, peinte sur vostre visage: ie me suis resolu en fin, de franchir toutes ces difficultez, m'estant persuadé, qu'elle couriroit l'imperfection de ce liure, par la bonne volonté, aueq' laquelle ie vous l'ay voüé, comme pour arres de mon humble & deuotieuse affectiō à vostre seruice. I E vous offre doncq, Monsieur, & dedie, ceste premicre partie des subtiles, & plaisantes inuentions, comme vn prelude, & auant-ieu, de choses plus rares, que ie vous reserue à vne plus ample, & prochaine edition: à fin que vous retirant de voz plus serieuses occupations, (lors qu'elles commenceront de vous ennuyer,) vostre bon esprit se puisse recréer, par le discours de ces gaillardes subtilitez. Que si vous daignez tant hōorer ce liure, de luy permettre, selō l'impatient desir qu'il en-à, de sortir en lumiere, souz la faueur, & protection de vostre nom: tant s'en faut qu'il soit desdaigné, qu'au contraire ie m'asseure, qu'il sera bien venu, & receu aueq' applaudissement, de tous ceux, entre les mains desquels il pourra tomber. Et auec ceste esperance.

Monsieur, ie prie Dieu vous donner longue, &

Epistre.

heureuse Vie, aueq tout autant de contentement, que
vous en desire.


Vostre plus humble, & affectionné
seruiteur. I. Preuost.

De Tolose, ce premier iour
de Ianuier. 1584.





4
P R E F A C E
A V L E C T E U R .



N C O R E que l'inscription de ce liure, (*Lecteur*,) te face, peut estre de premiere arriuee, iuger vain le labour que i'ay mis, & employé, à escrire chose, dont il ne semble pas qu'on puisse rapporter grand fruit: Je m'assure toutesfois, que si tu examines le but principal où ie vise, (selon que par la fin de chasque chose, nous auons acoustumé iuger d'icelle,) tant s'en faut, que tu me blasmes de vanité, que plustôt tu me sçauras gré, de la peine que i'ay prinse en ceste curieuse recherche, n'ayant rien tant affecté, que le profit du public. Car ayant veu de longue main, par toutes les meilleures villes de nostre France, le simple, & rude populaire charmé, & enforcélé, par vn tas d'Imposteurs qui courent le pays, & tellemēt liberal à payer la veüe de leurs belles denrées, que tel bien souuent, n'auoit que le sou, qui eut fait consciēce de l'espargner, pour n'estre priué de choses, lesquelles son foible iugemēt, & facile créance, luy faisoit iuger rares, & admirables: desrobāt, ceste race de gens infames, & emportant hors du Royaume, dans peu de temps, des sommes de deniers assez nota-

bles, au grãd interest de la Chose-publique. Et depuis ayant cogneu par succession de temps, que toutes ces drogueries n'estoient que pures impostures, pour faire venir l'eau au moulin, & attrapper de l'argent, soubz promesse, & appareçe de faire des choses qu'ils ne font nullement: imitans l'auare & meschant cuisinier, qui vouloit faire payer au gueux, la fumée du rost, au gout de laquelle il auoit mangé son pain. A ceste cause, j'ay pensé, estre chose necessaire, de mettre en lumiere, ces *subtiles, & plaisantes inuentions*, pour essayer, si ie pourray point en fin arracher le bâdeau d'ignorance, de deuant les yeux du vulgaire, & luy faire voir, comm'en plein mydi, ou dans vn miroir, les erreurs, esquelles ces supposez enchanteurs l'ont tenu iusqu'icy miserablemēt enuélé, s'estās tousiours faicts estimer, avec ie ne sçay quelles parolles barragouinement proferées, (inuétées pour faire peur aux femmes, & petis enfans,) & soubz cest effroyable, & gros mot de Magie, docteurs scientifiques en icelle, & superintendās, non seulement sur Lucifer, Astarot, Beel-zebu, & leurs pages, mais aussi sur toutes les Legions infernales, avec puissance absolüe, & autorité magistralle: ayant rencōtré vn si fauorable suiet à leurs affrontz, qu'est l'ignorāce mere d'erreur. Par laquelle ils se sont peu à peu si bien insinüés, & mis en credit, qu'en fin ils ont voulu faire acroire, (soubz couleur de ces petites tromperies, & par vne inepte cōsequēce, (des plus lourdes & grossieres badineries, qu'on sçauroit point imaginer. Tantost se vantans d'auoir la puissance, de captiuer à soy les volontés de ceux qu'il leur plaist, iusqu'à obtenir la faueur des Roys & Princes: maintenant d'embrafer di

feu d'Amour, les cœurs les plus froidz, & attirer à leurs voluptez, les plus pudiques femmes du monde: puis aussi, de voler en peu d'heure, d'un vol Pegasien, depuis un bout de pole iusqu' à l'autre, par l'aide de quelque braue coursier, emprunté de l'escuyerie de Pluton: choses si absurdes, & ridicules, que les contes-mesme des vieilles, ne le sont par daduantage. Car si la moindre, d'un bon nôbre, que ceux-cy, ou leurs semblables assurent impudemment, estoit veritable, y à-il si coquin d'eux, qui ne deuient incontinent Roy, ou Monarque? Mais ce qui ressent plus, entr' autres niaiseres, vne insigne bestise, & qui me faiët fondre en un ris Democritique, est ceste admirable vertu, par laquelle ils se disent rendre inuisibles, voulans qu'on attribüe fortement à vne substance solide, & corporelle, ce qu'on ne peut donner qu'à l'esprit, qui seul est d'une nature impalpable, & inuisible. Et si tout corps occupe vne certaine place, (côme à la verité c'est un axiome certain & naturel,) il faudroit de necessité, que le lieu occupé par ces inuisibles pretendus, fut caché à nostre veüe, ou que leur corps fut diaphane, & transparent. Et toutesfois, ez lieux, ou l'on pense qu'ils soiët, il n'y à coing, porte, ny muraille, qu'on ne voye touiours en un mesme estat. On pourra donc icy descouurir à l'œil, que tous les charmes, prestiges, & illusions, qu'on attribüe à ces abuseurs, ne sôt autre chose, qu'une souplesse de corps ou habilité de mains, par laquelle ils deçoüët les yeux: estant aidée bien souuent, par des artifices, & instrumentz ingenieux, quelquesfois par l'entremise, ou secreete intelligēce d'un tiers, qui sera faiët au badinage, soit pour le faire despouiller à nud, ou pour le faire

fauter, & danſer, ſeignant, (en iouant ſon rolle,) d'eſtre contraint, maugré luy, à faire toutes ces choſes. Ou bien aucunesfois, leur cas n'eſt, ſinon vne pure Magie naturelle, c'eſt à dire, vne vertu ſecrete, que le Ciel, & la nature, ont infuſe en pluſieurs choſes, par le moyen de laquelle, l'ouurier peut faire bien ſouuent des merueilles, & comme des prodiges, preſqu' incroyables à celuy, qui en ignoreroit la cauſe : laquelle toutesfois, eſtant puis après cogneüe, en la pluſpart de ces petites, & gaillardes ſubtilitez, faiſt ceſſer auſſi toſt l'admiration, par la facilité de la choſe, ſuggerant en ſon lieu, & place, vne nouuelle admiration à chacun, de ſa propre ignorance, pour auoir faiſt ſi grand cas, & n'auoir ſçeu deſcouvrir vne choſe ſi aiſée. Or, ſi l'euidence de cecy, eſt pour faire du fruiſt, comme ie deſire : i'eſpere que l'intelligence, (lors qu'aux heures de relais, il te prendra enuie d'en veoir quelque eſſay,) te ſeruira, comme d'un antidote, & remede certain, à l'ennuy, & chagrin que les occuppations graues, & ſerieuſes apportent à l'eſprit, lequel à beſoing, (de meſme le corps,) de quelque repos, & rafraichiffement: car autrement, tant s'en faut qu'il puiſſe durer en vn obſtiné, & aſſidu trauail, qu'au contraire il en diminüe ſa force, tout ainſi que l'arc qu'on laiſſe trop longuemēt tendu, vient à ſ'alentir, ſ'il n'eſt quelquesfois relâſché. Et voicy, *Lecteur*, vne ſeconde conſideration, qui fait, que tu dois auoir, ce mien labeur tant plus agreable, ayant par maniere de meſlange, non moins viſé à l'vtilité du public, qu'à ta particuliere delectation, ainſi que tu verras par le diſcours facetieux de ces choſes. Que ſi pour tout celà, tu ne laiſſes de me blaſmer, reiettant la double fin, &

intention, que ie me suis proposé : encore prendray-ie patience, d'auoir pour compaignons, *In eiusmodi ludicrorum perquisitione*, tant de grandz personnages, & excellentz Philosophes, qui n'ont pas desdaigné ces subtilitez ingenieuses, comme entr'autres Cardan, & Albert le grand, & despuis n'agueres, ce docte Vuerker Allemand, Medecin de Colmer, ainsi qu'on peut veoir dans leurs œuvres. Ausquelles, (bien que la plus part soient fabuleuses,) si tu prens quelque plaisir, tu ne dois pas, ce me semble, prendre moindre recreation en ce recueil, (tout petit qu'il est,) veu qu'au moins, tu n'y treuueras rien, qui ne soit veritable: m'estant d'ailleurs estudié, par toutes les plus propres demonstrations, dont ie me suis peu aduiser, de descouurir à fondz cuue, tour ces ieux de supplese, ayant esté contraint de necessité, à me porter vn peu prolixemēt, en ce qui m'a semblé plus difficile, à fin de le donner tant mieux à entendre. Ie t'offre donq *Lecteur*, ceste premiere partie, d'une œuvre toute entiere, laquelle i'espere te faire voir bien tost, si ce commencement t'est agreable, & que tu le reçois, par maniere de prouisiō, d'aussi bon cœur, que ie te le presente. Ce que si ie puis entēdre, ie m'estimeray auoir rapporté vne belle recompance, pour la peine que i'y ay employé. Et là dessus i'adiousteray ce souhaiet deuotieusement affectonné, en ta faueur, (aumoins si tu en as besoing:)

Sint tibi tōt nummi, tōt opes, auriq; talenta,

Poma quōt Alcinoi nobilis hortus alit.

A DIE V. Ce second de Ianuier. 1584.

HONEVR ET PAIS.

L. P.

Ad Auctorem huius libelli.

Marcellum Archimedes superans, suam ab hosti-
bus urbem


Liberat, & longo tempore castra quatit.

Roma virum mirata est: ista volumina Galli

Laudant, nam simili dexteritate vales.

G. Yd.

Sen. Thol.



Adeundem.

Dum conto exploras infamia gesta sagaci

Mimorum, illudis ridiculosq; iocos:

Te ales fama manet, varias remeanda per oras,

Quam nec edax series temporis ulla terat.

Iul. Dalloneus Lockiensis.

Ad D.Præpositum.

Sunt quibus austeræ placeat caperatio frontis,
 Atq; melancholico squallidus ore rigor:
 Cum tamen haud arcum iugiter distendat Apollo,
 Nec rigidis inhiet Stoica turba libris.
 In tua Præposite, eximiæ conamina mentis,
 Forsitan hi mittent tela seuera notæ,
 Immeritò: nanq; egregium est, velamine moto
 Pandere mens quod adhuc inscia noctis habet,
 Nè miserum posthac adeat spectacula vulgus,
 In quæis crassa videns, cernere mira putet.
 Nec secus implicita in manifesti tegmine veri,
 Ipse pater Sophiæ nosse cauilla docet:
 Tu tamen es potior, qui & a fra sophismata rerum
 „ Clarâs: res verbis dignius omen habent.
 Non timet aurifices libris exponere ludos
 Insuber, extra Orbem quem vaga fama vehit,
 Non timet Albertus subtilia prodere, ne se
 Postmodò mordaci cuspide lingua petat.
 „ Quare agè, pelle metum: nã cū scriptoribus amplis
 „ Probra subire, altus laudis habetur apex.

M. Le Clerc.

AD EVNDEM

Vt quos penes se habet, integros edat de Subtil. libros.

Nequid inexpertum nobis tu fortè relinquo,
 Ludicra perficito absconsi prænuntia veri.
 Hæc mihi semper erunt manuum monumenta tuarum,
 Vt norim quæ sint, & quæ ventura ferantur,
 Scilicet an cælo deducant carmina lunam,
 Nec non præstigiis socij mutantur Ulyssis.
 Hinc vos sortilegi procul ô procul este ministri,
 Expertes artis, quæ mira luditur arte.

I. Tachard.

AD LECTOREM CANDIDVM.

Quæcunq; ignaros oculos miracula fallunt,
 Quicquid agit, facili dexteritate manus,
 Disce breui libro, Lector: reclusa, quibusq;
 Fabellas oculis aspicias, ista lege.
 O quoties risit damnosis artibus Auctor
 Dum videt ad nugas, vulgus inane trahi!
 Te quoq; plebæia deceptum fraude, pudebit
 Ridiculos toties obstupuisse iocos.
 Si sapias, haud minimam meruisse fatèbere laudem,
 Qui tantis homines eruit è tenebris.

Vous qui d'un vol hautain, brusquement esleuez,
 Laissez derriere vous, vne presse beante:
 Qui frayez un sentier, où la troupe ignorante.
 Ne suit que de bien loing, le trac que vous suyuez.
 Vous, plus rares espritz, qui iamais ne treuuez,
 Rien qui vous rassasse, & rien qui vous contente;
 Voicy de quoy souler vostre faim languissante,
 En la diuersité des mets que vous auez.
 Icy se paist l'esprit, on treuve icy l'adresse,
 Icy se monstre à nud, la raison piperesse,
 De ceux qui plus subtils, nous embrouillent d'erreur.
 C'est-icy nostre phar'en l'obscur ignorance,
 C'est tout le plus subtil, c'est vne Quint'essence,
 Qui purgera de nous, le grossier, & l'impur.

A. Ydriard.

S O N E T à l'Auteur.

La France iusqu'icy, conuerte du manteau
 D'une lourde ignorance, hostesse familiere
 Des plus rudes esprits du simple populaire,
 Admiroit le sçauoir, d'un Bastilleur nouveau.
 Ce vulgaire assoti, & vuyde de cerueau,
 Prodiguoit son argent, sans aucun profit faire,
 Et iugeant des effects, croyoit tout le contraire,
 De ce, qui n'estant rien, luy sembloit estre beau.
 Mais par c'est œuvre-cy, que tu metz en lumiere,
 Tu apprens les moyens, & monstres la maniere,
 Delaquelle ces fous charmoient les ignorans.
 Donques nous tous François, te sommes redevables,
 Et ton liure, & ton loz, ne seront perissables,
 Ainzi viuront compaignons, de l'honneur, & des ans.

I. Constans.

Encore à luy mesme.

SONET.

Heureux qui peut, au vray la raison rendre
De toute chose, & les causes noter:
Heureux qui peut au public profiter,
Heureux qui peut, en enseignant apprendre.
Qui viendra donc ce tien liure reprendre,
Qui peut tout seul, ce profit apporter,
Que le vulgaire il sçait de s'anchanter,
En luy faisant sa sottise comprendre?
Ce sont thresors, & non pas des secrets,
C'est descourir, & la gluz, & les rets,
D'un Imposteur, que tout vn peuple admire.
Et ce qui rend ton liure plus exquis,
C'est, (ce qui est en vn' œuvre requis,)
Que le plaisir au profit nous attire.

I.H. de Pechcls.



9

LES SVBTILES ET PLAISANTES INVENTIONS.

*Pour cognoistre quelle heure il est au Soleil avec la
main, six mois de l'an.*

PAR ce qu'on n'a pas tousiours des horologes, ou des monstres & cadrās pour treuuer au soleil quelle heure il est, voicy vn moyen fort ingenieux pour vous seruir, allant sur les champs, de la main au lieu d'une monstre. Disposez donc tellement vostre main gauche, que durāt l'E-
sté & Printens, le poignet d'icelle soit vers le Soleil, c'est à dire que les raiz d'iceluy frappēt contre le poignet de vostre main par derriere, ayāt le doz tourné au Soleil, & tenez la main & les doigts estēduz tout du long. Puis prenez vne paille ou vergette deliée, (pour seruir d'indice) de la longueur qu'il y a, depuis la racine du pouce, iusques au bout ou extremité du doit enseigneur, & la colloquez par vn bout,

entre le pouce, & le mont de l'enseigneur, sur le commencement de la ligne vitale, la tenât pressée avec tout le pouce estendu & abaissé, en sorte que la verge passe hors la paume de la main, avec autant d'exiture, ou longueur, que le doigt enseigneur en a depuis la racine iusques à son extrémité. Voulant donc vser de cest artifice, apres auoir alsise & disposée, comme dit est, vostre verge, & sans qu'elle panche d'un costé ny d'autre: faites quel'ombre du gras du pouce, appelé le môt du pouce touche iustement la ligne vitale, & dressez peu à peu, la paille ou vergette (ayant esgard à la dispositiō de vostre corps tourné) iusqu'à ce que l'extrémité d'icelle, vienne vous mon-
strer quelle heure il fera, selon que les voyez marquées dās la figure de la main cy desoubz representée, depuis les cinq heures du matin, ou deuant midy, iusqu'à midy : & de rechef depuis midy, iusqu'à sept heures apres midy, & notez qu'en nostre figure, d. denotte les heures deuant midy, & a. celles d'apres:

l'endroit d'où où tombera l'ombre de la ver-
gette, vous enseignera l'heure : mais encores
ie le veux mettre au long, pour plus facile in-
telligence. Les 5. heures du matin , ou deuant
midy, (ainſi marquees, 5. d.) ſont comme vo-
yez: ſur la ioincture premiere, pres de l'extre-
mité du doigt enſigneur; les 6. h. ſur la ioin-
cture du bout d'enhaut du mitoyen; les 7. ſur
la ioincture du bout de l'anelier : les 8. ſur la
ioincture du bout du grate-oreille, les 9. ſur la
ioincture d'apres: les 10. ſur celle d'embas : les
11. ſur le mont du meſme grate-oreille: & les
12. qu'eſt midy, ſont ſur la ligne menſale. Puis
en remontant depuis midy, 1. heure apres mi-
dy, (ainſi marquée 1. a) eſt poſée ſur le mont
du meſme grate-oreille, (qui tantost en deſ-
cendant nous eſtoit ſignificatif de 11. deuant
midy) 2. h. ſont maintenant ſur la premiere
ioincture du meſme grate-oreille : 3. h. ſur la
ioincture d'apres 4. h. ſur celle d'enhaut : 5. h.
ſur la ioincture du bout de l'anelier : 6. h. ſur
celle du bout du mitoyen: & les 7. ſur la ioin-

Les subtiles

cture du bout de l'enseigneur: cōme pouués
voir en la figure suyuant. Il en y a qui se ser-
uent encore en hyuer, & en autōne de ce ca-
dran naturel, en disposant la main, & le corps
au soleil, d'vne autre façon: mais nous ne l'a-
uons encores essayé, parquoy nous nous cō-
tentons de le faire seruir à ces six mois de l'an.



Pour poser trois couteaux sur une table entrelacez d'une façon, qu'on ne saura imiter que avec toutes les peines du monde.

Prenez trois couteaux, les plus esgaulx que pourrez choisir à peu prez : l'un desquels que marquerōs, par ces lettres A. B. tiendrez avec la main gauche, par le mêche, puis mettez avec la main droicte, deux ou trois doitz de poincte du couteau C. D. sur le couteau A. B. autres deux ou trois doitz prez de la poincte, peu ou moins, selon la longueur des couteaux, en sorte que le bout du mêche D. soit en hault. Apres passez deux ou trois doigtz de pointe du couteau E. F. sur autant de poincte du couteau C. D. en sorte que la poincte de A. B. demeure appuyée sur C. D. & que passant souz la pointe B. le manche aille en bas, laissant aller, & reposer doucemēt les mèches, qui se treuueront appuyez sur la table, écartez l'un de ça, l'autre de là, par égales distâces, & les trois pointes entrelassées, & cōme suspendües en l'air, se tenāt si bien liées,

Les subriles

& appuyées en forme de triangle , qu'elles porteront vne pesanteur mediocre , sans se courber nullement. Le plaisir de cecy gist, en la facilité, que ceux qui vous l'aurót veu faire, iugerót estre en ce ieu, quand apres leur auoir brouillé & mélé les couteaux , ils ne feront autre chose puis apres , que les tourner d'un costé & d'autre, sans pouuoir les remettre en leur disposition traingulairement enlacée. Ce fera cependant à vous , à rire & gossier , les voyant tant embesognez, &, par maniere de dire, suër d'ahan en si peu de chose.



*Pour faire ſauter vn couteau hors d'un pot
ſans le toucher.*

FAites faire à vn ferrurier vn petit reſſort de
bõ acier, de la longueur de quatre doigtz,
de largeur du petit doigt, & de leſpeſſeur du
tail d'un couteau en la forme que voyez icy
miſe, faiſant grauer trois ou quatre poinctz,
prez du bout long A. pour aſſoir vn ou plu-
ſieurs couteaux, & faut que le bout A. ſoit
ſi long, qu'eſtât courbé & abaïſſé en bas, ſouz
le petit bout crochu B. il frotte ſeulement de
contre, ſans eſtre empeché de paſſer du tout
en bas: & voulant bander ce reſſort, ayant a-
baïſſé du tout embas le bout A. par deſſous le
bout B. metez entre deux pour le bander, vn
petit morceau de pain ſec, ou biſcuit, metant
ce reſſort ainſi bandé, ſecretemēt dans la mā-
che, ou pour plus finement iouer ce ieux, le
mettrez ſouz la taſſete du coté de voſtre pour
point. Puis vous ayant fait apporter vn grand
& large pot d'eſtain, & l'ayant mis au milieu
de la ſale en faiſant ſemblant de mettre voz

deux mains aux costez par forme de brauade
vâtez vous de faire par grâde merueille sortir
hors de ce pot deux ou trois couteaux, fâs les
toucher, & tirant les mains des costez, pour
vous disposer à faire cecy, emporterez secre-
tement l'engin, le tenant caché adextremement
dans la main, laquelle vous enfoncerez dans
vne escuelle de som, que vous ferez fait ap-
porter, & faisant semblant d'emporter vne
poignée de som, que direz servir à vostre mi-
stere: (mais c'est pour cacher mieux vostre ar-
tifice,) le metrez au fondz du pot, & faisant
encore semblât de le bié renger, poserez vo-
stre instrument au fonds que le ressort soit en
haut, sur lequel puis aprez metrez vn ou deux
ou trois, couteaux, les appuyant par la pointe
sur les trous qui y sont. Et incontinent vous
ayant fait apporter de leau, emplissez le pot à
demy, & soudain vous reculez, faisant com-
mandemēt à ces couteaux, qu'ilz ayent à sor-
tir hors, par la vertu de certains mots q̄ gro-
melerez entre voz dens, pour rauir en plus


grand admiratiō les moins rusez, & l'eau venant à ramolir le pain, le ressort se desbâdera, & poussera en haut les couteaux hors du pot.



*Pour faire tourner vn couteau sur la pointz
d'une eguille.*

FAiçtes vn petit baston, A. de la lōgueur de demy pied, tout rōd, & de la grosseur requi se pour entrer dās le trou d'vn chādelier de la tō B. dans lequel mettez & pressez ce court bastō, en lieu d'une chādelle, & faut qu'ayez plustost fait au bout d'en haut du baston vne fente C. dans laquelle mettrez vne eguille à coudre D. la teste en bas, & la pointe en haut la ferrant & assureāt qu'elle se tienne droicte, & ferme. Cela faiçt fichez vn couteau par la

poincte E. cōtre vn autre bastō F. de mesme longueur, & grosseur, que l'autre, & pres du bout d'iceluy: Puis posez le couteau vers le milieu d'iceluy, le doz renuersé sur la poincte de leguille, l'asseurant peu à peu, en l'agençant, & remuant iusques à ce que par la vertu du



contrepoix, il demeure suspēdu, sans tomber sur la poincte de leguille, & non seulement il se soutiendra dessus, mais encore en soufflant

doucement & continuellemēt cōtre le cou-
teau, tantost au manche, & puis à la poincte,
il fera plusieurs tours, & voltes en rond, sans
tomber.

*Pour faire que mettant vn tranchoir sur vn chā-
delier, & vn couteau sur le tranchoir, puis vn
liard sur le couteau, & poussant le trāchoir avec
vn coup de main, le liard se trouuera dās le trou
du chandelier.*

PRenez vn tranchoir de bois, & le posez
sur le trou d vn grand chandelier de leton,
qui aye le trou assez large, le posant par le
milieu avec la plus grande proportion que y
pourrez obseruer, & par dessus, & à trauers le
tranchoir, posez vn couteau, aduisant aussi
qu'il responde, en estant ainsi couché de tra-
uers, sur le trou du chandelier, en-tant que la
perspectiue de lœil vous pourra guider, &
faut q̄ le tail du couteau soit tourné en haut.
Après posez vn double, ou vn liard, sur le

manche du couteau, si bien qu'il respõde aussi, droictemēt, ou le mieux qu'il se pourra faire, sur la bouche du chandelier: Lors poussez de la main, asses rudement, avec vn coup sec, & brusque, le tranchoir dehors, & autant de fois que vous ferez cecy en la mesme sorte, tout autant de fois la piece se trouuera dedans le trou du chandelier.

Qu'il semblera qu'ayez auale vn couteau, & que le rendiez apres par le bas.

CEcy, comme la plus part de ces ieux, ne cõciste principalemēt, qu'en habilité, qui s'aquiert par exercice, & sãs laquelle, ces ieux de recreation perdent leur grace, avec la moquerie qu'en rapporte celuy qui se mesle de les pratiquer autrement, estāt puis apres decouuert des asistãs: mais s'il y apporte la dexterité requise, & la sauce, des petits mots lesquels y sont comme substãtifiquement substantiaux, veritablement i'ose dire qu'il n'ap-

portera pas moins de recreatiō, & plaifir, que de merueille. Pour reuenir donc à ceste subtilité: il faut que foyez afsis à table, fur vn bāc qui ne foit pas trop haut: Puis tenant voz genous fous la table, ferrez l'vn contre l'autre, prenez vn couteau qui ne foit pas gueres lōg & le tenant appuyé par le manche, fur le bord de la table, à plaines mains, affauoir la droite par deffus la gauche, en forte que trois ou quatre doitz de pointe paffent hors, vous ferez comme fi le vouliez aualler, baiffant vn peu la teſte, en ouurant la bouche, & hauffant les mains: mais à meſme inſtant que leuerez les mains pour faire ſemblant d'approcher la poincte de la bouche, laiſſes couler, & tōber le couteau fur les genous, en frappāt des deux paulmes des mains eſtenduēs contre voſtre bouche, l'vne apres l'autre, comme ſi vouliez coigner le couteau, apres auoir iecié pluſtoſt vn grand cry, en tournant les yeux dās la teſte. Cela faiēt, leuez vous debout faiſant, de l'vne main tenir promptemēt le couteau en-


tre voz iambes, & de l'autre en alongeât sou-
uent le gosier, comme si le sentiez au passage
qu'il vous estranglast, frottez le col en bas a-
uec les mains en l'alongeant tousiours, &
contrefaisant vn qui veut aualer, & ne peut,
faisant resonner vostre gosier: En fin pour le
faire tant mieux descendre, iusques dans l'e-
stomac, faites vous apporter du vin, & beuez
vn bon traiçt là dessus. Finalement dites que
vous n'avez point l'estomac si chaud cōme
l'autruche, qui digere le fer, & que ne pouuât
cuire, & digerer ce couteau, aussi facilement
que vous feriez vne aïlle de perdris, vous n'a-
uez remede que de le rendre par bas. Lors
mettant vne main derriere, le tirerez d'entre
les iambes, en iectant vn autre grand cry: Et
ceux qui ne seront pas des plus rusez, seront
aussi estonnez, que si cornes leur naïssioient,
cuydās que vous soyiez vn insigne gladi-vo-
re, ou quelque grand magicien qui les ayez
charmés. Aux autres vous aurez appresté
matiere de rire, non sans quelque admiration

de la subtilité ingenieufe , pourueu que vo-
stre peu d'experience ne defcouure la ruze.

*Pour faire de trois pailles, neuf pieces égales, avec
trois coups de couteau seulement.*

PResentez à celuy, contre lequel voudrez
gager, trois petites pailles, esgales en lon-
gueur, & luy dites qu'il face, avec trois coups
de couteau, qu'elles soyent reduites en neuf
pieces, autant longue l'une comme l'autre:
mais à grand peyne en viendra-il à bout, s'il
ne sçait la disposition qui est requise en cecy.
Or si ayant gagé contre luy, vous le voulez
faire vous mesme, il faut disposer les pailles
par la proportion que les voyez en la figure
d'apres, en sorte que sur le milieu estans l'une
sur l'autre, il s'y forme comme vn triangle &
que les six boutz passent hors le triāgle, avec
autant de lōgueur, chaque bout de paille qui
fort, cōme est longue chaque partie du trian-
gle. Puis coupez avec vn coup de couteau

les deux boutz A. B. en l'endroit où voyez
vne petite ligne traufferant: apres coupez de
mesme les boutz C. D. en l'endroit marqué:
finalmēt E. F. en son lieu. Vous voyez dōc
que ces trois dissections vous ayant couppé
six pieces égales des boutz, vous en laissent
par mesme moyen trois autres égales pro-
uenies du triangle qui est demeuré couppé.



*Pour faire voir, & se perdre en un mesme temps
trois petis lopins de papier, posez sur un couteau.*

Coupez six petis lopins de papier, qui
soient quarrez, & ayant du bout du doigt,
mouillé

mouillé les deux endroitz du couteau, pofez les trois petits papiers fur vn coté, l'vn affez près de l'autre, vers le milieu du couteau, & les autres trois de l'autre costé en mefme difpofition, & distance. Apres tenant le couteau par le manche, & donnât deux tours de bras avec le couteau, comme si vouliez bailer vn taillant droit, & puis vn reuers, montrerez vn des endroitz, & puis l'autre, leur difant qu'ils y voyent au moins à chacun, trois petits papiers attachez. Puis en faifant semblant de frotter contre le dedans de vofre bras, les deux endroits du couteau, n'en frottez touiours que l'vn, paffant habilement vn mefme endroit contre le dedans du bras, ce que ferez en frottant vne fois la pointe en bas vn' autre fois la pointe en haut : Car par ee moyen en frottant ilz ne verront deuant eux qu'un mefme costé, pëfant en veoir deux fans papiers: car celuy où les trois font encores attachez, demeurët toufiours deuers vous fans qu'on les puiſſe veoir. Cela fait montrés leur


avec le tour du bras tirant de la main gauche vers la droicte, & tenant l'enuers de la main en haut, comme si vouliez bailler vne taillade, l'endroit où il n'y a rien: puis le tournant adextrement, de la main droite vers la gauche, & le dedans de la main regardant en haut, leur montrerez le mesme endroit, ce que faut tousiours faire, en tournant vn peu le manche du couteau dans la main: car par ce moyen ne faisant parade & montre, que d'vn endroit, on pësera les voir tous deux. Finalement frottez encore le costé vuide, pour faire sembler que faciez reprédre, & reuenir les papiers, avec la mesme precaution qu'auons montré au commencement pour faire sembler que les faciés perdre de tous les deux endroits. Et incontinent apres, vous montrerez encores quelques fois le costé où sont les papiers, avec les mesmes tours & adresse qu'auons dit, pour faire croire, en deceuant & trompant la veüe par vostre dexterité, que vous monstrez les deux costez (en n'en presentant

toutesfois que l'vn garnis de leurs petis papiers, comm'ilz estoient au commencement: mais se faut contenter de faire ce paffetemps vne feule fois, ou deux, de peur que le faifant trop fouuét, vous ne foyez attrapé: mais auffi le faifant accortement, il fera treuué affez subtil. Il y à de mefme d'autres pareilles subtilitez qui veulent eftre peu fouuent pratiquées, pour le danger qu'il y a qu'on les defcouure: comme auffi il en y à plusieurs autres tant elles font affeurées, qui ne craignent de defpiter les plus vifz espriz qui pourroïent eftre prefens: Combien que la plus part des vnes, & des autres, bien qu'elles apportent de l'admiration, en l'endroit de ceux qui ignorēt leur artifice, eftans puis apres defcouvertes & aprinſes, font trouuées comme ridicules: donnant à chacun puis apres, matiere non moins grande de ſe rire & moquer de ſa propre ignorance, & ſimpleſſe, comme au parauant il penſoit y auoir en la choſe ignorée, de merueille, & artifice.

*Comme vous ferez soustenir vn croisol sur le bout
d'un os, posé par l'aure bout, sur le bord
d'une table, sans tomber.*

Prenez cest os aucunement plat d'un costé
& de l'aurre esleué en bosse ou eschine, qui
à vn trou, ou concauité pleine de chair, dont
il s'en treuuent deux conioints ensemble, fai-
sans le croupion d'une poule, comme a peu
pres vous le voyez icy bas representé: & faut
qu'il soit tiré d'une grosse poule, ou gros cha-
pon, pour estre plus fort, & qu'elle aye esté
bouillie, à fin q ces oz se puissent apres mieux
separer, & marquerons cest os A. Metez
le crochet du croisol B. dans le trou C. en for-
te que la queuë, ou pointe d'en-haut D. s'ap-
puye contre le costé large de los E. puis posés
& appuyez le bout F. sur le bord de la table
G. qu'il ne tienne que fort peu, & verrez qu'il
soutiendra le croisol, pour si pesant qu'il soit,
sans tomber: Mesme appuyant le bout de cest
os, sur l'ongle du doigt, vous porterez en

ceſte façon le croiſol par toute la chambre,
ſans qu'il tombe nullement, avecq' eſtonne-
ment de ceux qui le verront.




Les subtiles

*Pour faire soustenir vn pot d'estaing, sur le bout
d'un petit baston, qui sera appuyé seule-
ment par l'autre bout, contre le
bord de la table.*

Prenez vn pot d'estain A. qui aye vne anse
B. ou sinon, faites luy en vne, d'une corde
en double comme voyés: Puis prenez vn ba-
ston C. qui ataigne depuis le fonds du pot,
iusques à son anse, & faut que deuant que le
mettre dans le pot, vous coupiés le bout d'en-
haut du baston D. en forme d'un tail de ci-
feaux. Puis prenez vn autre petit baston E. de
la longueur de demy pied, plus ou moins, au
bout duquel, marqué F. ferez vne fente, ou
brèche, dans laquelle ferés entrer, & asseoir, le
bout de l'autre baston D. l'asseurant si bien, &
estançonnant, qu'il ne puisse bouger, ne re-
culer, & faut que le petit baston E. passe iuste-
ment soubs la moytié de l'anse, ou de la cor-
de B. Cela ainsi acheué, appuyez le bout du
baston G. sur le bord de la table H. Et pour

peu qu'il tienne, vous verrez incontînēt, que le pot se soutiendra d'une estrange façon suspendu, sans tomber, encore qu'il soit tout plain d'eau.




*Pour faire sauter vn sou hors d'un bassin,
sans le toucher.*

FAictes faire vn petit ressort A. de la façon & grandeur que le voyés icy bas peinct: & faut qu'il soit seulement espais comme vn tail de couteau delié, & large enuiron d'un trauers de doigt, & que le bout long marqué B. estant abaissé, contre le bout court recourbé marqué C. vienne passer pres dudit bout

C. sans toutesfois qu'il le touche. Voulant donq faire ce passe temps, bandés ce petit ressort, en abaissant du tout le bout B. & mettât vn grain de sel gros entre ce bout B. & le bout C. pour tenir le bout B. tout bandé. Et ce ressort estât ainsi tout prest, tenez le caché dans la manche: Puis faictes apporter vn bafsin, & mettés le bafsin au milieu de la sale, sur vne escabelle, loin des autres: & faisant semblant de mettre vn sou dans le bafsin, & l'arranger, en tenant les mains dans le bafsin, tirez secretement vostre ressort de la manche & le poserés dans le bafsin, qui doit estre en quelque lieu vn peu haut. Et mettés dessus le ressort, le sou, ou autre piece de monoye, l'appuyant moytié sur le crochet C. & moytié plus bas. Apres faictes vous apporter de l'eau de la quelle ayât mis dans le bafsin vne partie reculés vous, & pour donner plus grand couleur à ce mistere, faites voz commendemens réforcés de parolles sacraméntales, & ceremonies requises: & peu apres, (& nottés qu'il ne


tardera pas guerres) le sel venant à se fondre par l'eau, le ressort se desbandera, & poussera hors en hault la piece, puis en retirant la piece retirez, & cachés adextrement vostre ressort.



Pour leuer en hault, avec vne paille, vn gros bocal, ou fiole, plaine deau.

Prenez vne longue paille, qui ne soit point pliée, que marquerons A. B. & la repliez au fonds, par les endroits C. D. faisant passer le reste de la queue qu'avez laissée B. D. par dessus, & a trauers la longueur de la paille, en sorte, que comme voyez il se forme vn triangle, C. D. E. Puis pour faire entrer ceste paille, & vous en seruir. Ioignez B. C. D. tout le

long de la longueur de la paille A. & mettez cecy dans la phiolle : Apres tirés par le bout A. & verrez, que B. D. porterōt, & soufleuerōt le bocal. Vous ferez encores cecy plus seurement , en ceste sorte : Pliez vne longue paille en vn lōg triangle , de sorte que par bas elle vous rende deux angles, A. B. cōme voyez representé en la seconde figure : & voulant vous seruir de ceste paille, ferrez & ioignez B. en alongeant ce costé, cōtre le bout C. en sorte q̄ le bout D. passe plus que C. d'autant de distance qu'il y a, despuis A. iusques à B. Et lors qu'aurez par ce moyé mise la paille dedans, poussez D. contre bas, & le remettant égal à C. pour refaire comme deuant, voz deux angles A. B. lesquels tirant par les bouts C. D. emporteront, & soustiendront ayseement le bocal , comme pouuez iuger, tant par l'experiance qu'en pouuez faire, que par la demonstration necessaire de ces deux figures.



*Pour faire sauter vn aneau dans vn gobeau, par
vn tour de subtilité.*

PRenez^e vn mouchoir, au milieu duquel,
aurez cousu secretement, avec vn petit de
toille, vn aneau de courtine, & tenât vn sem-
blable aneau caché entre voz doigts (en sorte
toutesfois, que voz deux mains posées sur ta-
ble, soyent tellement disposées, que les doigts
ne demeurent point, ny aussi la main, ferrée
ny cōtraincte, de peur qu'on ne s'aduise qu'a-
uez quelque chose dedans) metés sur la
table couuerte d'vn tapis, vn goubelet de
fucille de fer blanc, avec la main que tenez l'a-
neau, le laissant habilement couler dessous,

Les subtiles

(qui est vn traict d'habilité de main , depen-
dant du ieu des gobelets , & s'aprenant par e-
xercice,) puis ayant prins vn semblable aneau
à la vëue de tous , & couurant la moytié du
mouchoir, ferez semblant de le y laisser: mais
le garderez caché entre voz doigts, ou le laisse-
rez choir deuant vous , qu'on ne le voye , ny
entende , leur faisant incontinent taster par-
dessus le mouchoir, l'aneau coufu, qu'ils pé-
feront estre le dernier. Lors leur ayât dit que
voulés faire treuuer sous le Gobeau, l'aneau



qu'auiez mis dans le mouchoir , le secouerés
sur le cul du gobeau , montrant puis apres le
mouchoir estendu sur table, où le secouât en-
core deuant eux: en fin leuant le goubeau , ilz


demeureront eftonnez, comme fondeurs de cloches, de le veoir deffouz.

Pour faire vn goubeau, dans lequel eftant plain de vin, on pourra boire : mais y meflant tant peu d'eau que ce foit, tout versera comme on pensera boire.

FAites faire vn gobeau de feuille de fer blanche, tout rond, & tout d'une venue, affa- uoir autant large par hault, que par bas, de fix trauers de doit de hauteur, & de largeur ref- pondante à la longueur, comme aduiferés. Puis faictes foudier à deux doictz près d'em- bas, vn rondeau de la meſme fueille, pour ſer- uir de fonds, au milieu duquel ayant fait vn trou rond, faites paſſer à trauers, vn tuyau, ou canule ronde, de la groſſeur d'une petite plu- me de cygne, le ſoudât bien tout à l'entour du trou du rondeau: Et faut qu'il deſcende en bas pour égaller préſque en longueur les bords du goubeau: mais nō pas du tout, & que de meſ-

mes, il soit par haut, vn peu plus court, que le haut du goubeau. Apres couvrés ce petit cano par dessus, d'vn autre canon plus gros doublement, qui soit fermé par haut, par où il doit estre égal en longueur, aux bords d'en haut de vótre goubeau, & par debas, le souderez, & appuyerés par dessus le fonds du goubeau, ayant fait quatre dechiquetures à ce bout, pour l'as-
soir en sorte, qu'estât ainsi soudé, ces quatre re-
plis, ou decoupeures, laissent quatre petis per-
tuis, demeurant le petit canon au large dans le grand. Et faut laisser ouuert le bout d'embas, du petit canon. Le tout voyez clerement re-
présenté par toutes ses parties, & à descouuert comme vne anatomie, par la premiere figure, sans qu'il m'aye semblé estre besoin de plus grand demonstration: Car quant à la seconde figure, elle represente la forme de ce goubeau tout entier, & couuert, tel qu'il est quand il est acheué. Or l'emplisât de vin iusques pres des bords d'en haut, le vin ne peut verser: car il pas-
sera par les quatre petis pertuis. & s'entonnera

en montant, dans le gros tuyau: mais eftant le gros canon plain, fi vous verfez dans le goubeau, vn peu d'eau, (ou du vin d'auantage, car c'eft tout vn, & c'eft feulement, pour faire accroire que ce goubeau eft ennemy de l'eau) vous voyez que de neceffité il faut, que toute la liqueur du gros canon, defcende, & tombe par le petit, attirant tout le refte, qui eft dans le goubeau, en forte qu'il n'en y demeurera pas vne goutte, trompant par ce moyé celuy qui penfera boire. Mais il faut, à peu pres, que le vuide du gros canon, tienne quafi tant de liqueur, que le vuide du goubeau. Et nottez que cecy peut feruir à vn orpheuure, habile en fon art, comme d'vne modelle, pour en faire vn d'argent, pour le paffetemps d'vn grand feigneur, faifant qu'avec tous ces artifices qui y font requis, il ne laiffiera d'auoir la forme, requife à vne petite taffe, pour le rendre plus agreable: car par le pied, il pourra faire paffer le bout du petit tuyau, accommodant le refte par dedās, & faifant la taffe vn peu haute, & eftroite.



Pour faire sauteler vn aneau dans vn verre, à mesure qu'il vous plaira, sonant des mains vn branle, sur le bord d'une table.

CEcy peut estre pratiqué en ceste sorte en cōpagnie, avecq' vne merueilleuse grace. Prenez vne petite bague, à la quelle attacherez en l'endroit de la pierre, ou en quelque autre lieu caché, vn poil de la teste d'une femme par vn bout, avec vn fort petit de cire: Et attachez de mesme l'autre bout, au doigt indice de la main droicte, & faut le porter dans vostre doigt, tout prest, en la mesme sorte, à fin que faisant cecy inopinément, & sans aucun preparatif

paratif, on treuve la chose rant plus belle, & admirable. Voulât donq faire ce ieu de recrea-
tion, comme voulant semondre & inuiter la
compagnie, à rire, & danser, par le tesmoigna-
ge de ioye, & alegresse, qu'une chose morte, &
insensible mōtrera, vous tirerés l'aneau de vô-
tre doigt, & l'ayant mis dans vn verre, poserés
voz mains sur table, vn peu loin du verre, se-
lon la distance requise, à faire remüer l'aneau,
qu'est attaché par le bout du poil, à vōtre doit
& lors chantant, & sonnant des mains sur la
table, tel brāsle qu'il vous plaira, l'aneau saute-
ra & dancera à merueilles, imitant les poses &
cadances de vostre chāson, selon que le saurés
adextremement manier, & conduire de la main.
Et lors que vous ne voudrés point qu'il bou-
ge, nonobstant vōtre branfle, ou ce qu'on chā-
tera, apres que luy en aurés fait deffence, frap-
perés des mains, les approchant vn peu plus
pres du verre, à fin que le poil n'estant point
tendu, l'aneau demeure immobile, comme s'il
auoit de l'entendement, ou quelque demon,

& esprit caché dedans, pour le rendre, à point nommé, obeissant à vótre volonté. Ie sçay que nous treuons en escrit vn autre moyen de faire sauter vn aneau de laton creus par dedans, & rempli de mercure, ou vis argent, & selon d'autres, de souffre, salpêtre, & mercure, en estoupant le cōduict, puis chauffant l'aneau. Car tant qu'il est chaud, le mercure s'agitant, & demenant, fait remuër, & sauter l'aneau: mais c'est vn court passetemps, & qui n'a pas grand' grace, par ce que la chaleur passée, aussi tost il s'arreste.

Pour faire passer vn anneau, d'vn mouchoir dans vn baston, par vn traict de subtilité, qui sera treuue merueilleux.

PRenés vn mouchoir, & cousez secretemēt à vn bout, avec vn petit rondeau de toille, semblable à peu pres, à celle du mouchoir, vn aneau rond de courtine, ou autre, sans pierre. Et voulāt faire ce traict de subtilité ingenieuse,

fortés vostre mouchoir de la poche, acoutré comme dit est, & l'estendés sur le bout de la table, en sorte que le bout où est l'aneau cousu pende en bas deuant vous: & tenant vn petit baston rond, & long d'vn grand empan, avec la main droicte, pour seruir tantost, comme verrés, de couuerture à ce ieu, fortés vn pareil aneau, deuant la compagnie, & le posés sur le milieu du mouchoir, tenant vótre verge tousiours à la main: & prenés le bout d'embas qui pend deuers vous, auquel est l'aneau cousu, & le mettés, avec la main droicte, sur le milieu du mouchoir, & de la gauche, abaissérés aussi sur le milieu du mouchoir, le bout d'en haut d'iceluy, pour faire semblant, de couvrir par ce moyen, le second aneau, & le vouloir cacher dans le mouchoir: Mais en vn mesme instant, vous le garderés caché entre les doigts anelier, & grat'oreille, le tenāt empoigné avec le bastō, dans la main droicte, à fin que la voyant ferrée, on pence que c'est pour tenir la verge: Et tenant de la main gauche l'endroit

où est l'aneau coufu, ferré & enuëloppé, faites le taster, & manier, à fin qu'on pense en tastât que ce soit l'autre: lors baillés à quelqu'un à tenir entre ses doigts ce mouchoir, par dessous l'endroit où est l'aneau enuëloppé: & à un autre, faites tenir la verge par les deux bouts, apres auoir fait entrer dans l'aneau le bout d'icelle, que tenés caché, en poussant adextremët & faisant couler la main au milieu de la verge, & faut, que côm'il tient par les deux bouts avec ses mains haussées, que vous teniés aussi par le milieu, la verge à plein poin, pour tenir caché & couuert, l'aneau qu'aués coulé, & fait glisser dedans comme dit est: lors dites à celuy qui tient le mouchoir, que vous voulés faire passer miraculeusemët, l'aneau qui est dessous dans le baston, & incontinent ayant soufflé sur le lieu du mouchoir, où l'aneau est apparent, dites luy qu'il le laisse aller, puis le secoüant de roideur sur le milieu du baston, en ostérés à mesme instant la main, & il n'y à celuy de la troupe qui ne demeure aussi esbahy, de

voit l'aneau dedans, comme s'il estoit tombé des nuës. l'ay veu faire cecy autrement, pour oster le soupçon que quelques vns plus rusez pourroient auoir, que l'aneau fut dans le bastõ sous vótre main, ne la vous voyant point lascher. C'est, qu'apres l'auoir poussé dedans, par le petit tour de main qu'auons dit, & ayant baillé à tenir le baston, ils couurent & environnent promptement le milieu du bâton, (apres en auoir retiré la main,) avecq vn autre mouchoir qu'ils se sont fait bailler, & ayant apres secoüé l'autre qu'on tient, & déplié le mouchoir, ilz montrét l'aneau dans le bastõ.


Pour faire sortir vn aneau de fer hors du pan d'un manteau, dans lequel il sera lié, & encore tenu serré par dessus à plain poing, par quelqu'un.

FAites faire deux aneaus de ce fil de fer, vn peu gros, que les grossiers vendent de la grâdeur que voyez representée icy bas, & faut que l'vn, qui est noté A, soit soudé au milieu,

pour estre entier & tout rond : Celuy qui est marqué B. doit estre rompu comme voyés, ayant le bout C. mouffu, & le bout D. poinctu & vn peu recourbé dessous le C. estant vn peu surpalsé d'iceluy, & qu'il y ait entre deux vne mediocre distance . Or voulant faire ceste gaillarde subtilité, (qui à la verité estonnera les plus accords, & huppez, sans la pouuoir nullement descouurir) tenez caché dans l'entrée de vostre mêche, à la main gauche, l'aneau B. & prenant deuant tous l'aneau A. tirez secretement l'aneau B. de la mêche, tenât les mains souz le pan du manteau qu'il portera vestu, & ayant remis l'aneau A. dans la manche, faites luy empoigner le pan du manteau par dessous & plus bas que n'est l'aneau, le luy faisant taster, ainsi enueloppé qu'il est, voire lier avec vne corde ferme. Mais tenés les deux doigts par dessus l'endroit où est la rompure de l'aneau, de peur qu'en tastant, & maniant, il ne rencontrast la poincte, & descouurit par ce moyen la fourbe. Apres couurirez ce pan où est l'aneau

avec l'autre pan du mâteau, & tenât les mains
sous le manteau, disant vne kyrielle de mots
barragouynement proferez, ferez passer, &
sortir l'aneau, hors du manteau, lequel s'estant
fait faire entrée par la poincte, & le poussant
en tournoyant, sera incontinent dehors: & en
mesme instant, sortez l'autre entier de la man-
che, mettant cestuy-cy rompu en son cachot
& l'entier dans le bout du pan du manteau lié,
en sorte qu'il demeure dedans. Et tout cecy a-
cheué, faites souffler, à celuy qui tient le man-
teau, dans le milieu de vostre main, avec la-
quelle frapperés sur le mâteau, en l'endroit où
est l'aneau, & incontinent descouurant l'autre
pan du manteau, vous en verrez qui ioueront
à l'esbay, voyans le mesme aneau que leur a-
uiez monsté au commencement, estre dehors,
pensans que ce soit celuy-la mesme, qui estoit
emprisonné: mais sur tout, celuy qui auoit tou-
siours tenu les mains fermes, & serrées sur la li-
gature, sera ravi avec plus grande merueille, ne
pouuant imaginer, cōment vous le luy auez

osté, sans qu'il en aye rien senti, & sans que le manteau, n'y l'aneau, soiēt patissans aucune solution de continuité, pour parler chirurgicalement, ou en Anatomiste.



Comme vous sortirez vn aneau, ou clef, d'une corde en double, nouée par les deux bouts, vn autre la tenant dans les ponces, sans l'oter des doigts.

DOublés vne corde, ou iarrettiere, faisant vn nœud aux deux bouts, & metez dedās vne bague, ou clef, & faites tenir à vn autre ceste corde, passant les deux ponces dans les deux extremittez d'icelle. Et voulant fortir cela dedās, baïssez la corde d'en-haut, embas, vers le costé qu'il tient de la main gauche, avec le doigt enseigneur de vostre main droite, en sorte qu'elle passe par dessus, & plus bas que

l'autre corde, puis avec l'indice de la main gauche, passerez dessus l'autre bout du doigt enseigneur de la droiçte, la corde qui est maintenant superieure, & en la passant du tout dessous, la mettrez, & porterez, dās le pouce de sa main gauche, tenant tousiours le doigt enseigneur, sur la corde qu'auies premierement abaissée, & par ceste entrelaceure (si auez bien fait ce que dessus,) se formera comm'vn trou, vers l'endroit de l'enseigneur de la main droite. Apres prendrés avec le pouce, & l'enseigneur gauche, la corde superieure, c'est à dire, qui en sa disposition, occupe lieu plus haut, du costé, & au-prés de sa main droiçte, mettant c'este corde dans son pouce gauche: puis dites luy, que tandard vn peu rede ses mains, il ferme hardiment le pouce, & l'enseigneur de chaque main, à fin qu'on ne pense que bougiez la corde hors de ses doicts. Lors laissant aller ce que teniez replié au commencement avec l'indice droit, & tirant la bague avec la main gauche, elle se treuuera hors, & la corde au mesme

estat , & disposition , qu'elle estoit au beau commencement.

Comme vn plain verre d'eau ne versera point , en mettant plusieurs getz dedans.

IL est certain, que si seulement vous mettez le bout du doigt dans vn verre plain d'eau, iusques aux bordz, que l'eau versera, pour faire place à ce q̄ mettez dedans. Toutesfois voicy vn cas assez estrange, que i'ay bien en passant voulu mettre icy. C'est , que si vous laissez cheoir tout-bellement dedans, plusieurs getz, l'vn apres l'autre, voire iusqu'au nôbre de cinquante , ou soixante, & par fois, daduantage, l'eau toutesfois ne versera point: mais plustost sera veuë surmonter , & s'esleuer par dessus les bordz du verre, sans s'escouler aucunement, bien que les getz qui seront dedans, occupent assés de place, & facent vn monceau esleué au fonds du verre. Vous pouuez faire encores cecy avec des sous, ou des carolus.

Pour couper vn verre tout à l'entour, si biẽ qu'il s'allongera, & racourcira comm'vne lanterne, sans rompre.

Prenez deux ou trois grosses & vieilles cheuilles rouillées, & les embrasez par le bout: Puis posez le bout de l'une, contre le bord du verre, la tenant de contre, iusques que le verre petillant, le bord se vienne en cest endroit, ouurer & entamer par haut, s'y faisant vne petite fente longuete. Lors posez vn peu plus loin en haut, & comme à costé, le bout de l'autre cheuille rougie, remetant ceste cy en son lieu, à fin que tousiours l'une, ou l'autre, soyët rouges, & la laissés, comme dit est de l'autre, autât contre le verre, que de rechef petillant, il se face vne autre fente, descendant du bas de la premiere qui s'estoit formée droicte, & montât de trauers, à costé. Apres posez vn'autre cheuille plus bas, aussi à costé, & de trauers, pour former vn'autre fente semblable. Et tournoyant ainsi peu à peu le verre, en mettant vne

cheuille, tãtoſt en haut, tantoſt en bas, iuſques paſſablement près du fondz; le verre ſera coupé tout à l'entour, à façon de iambes de grãdz M, ou brèches triangulaires, leſquelles, (en alongeant le verre, puis en le remettant,) s'entrerécontreront touſiours, & remettront iuſtement l'vne dans l'autre: de façon qu'il pourroit quaſi tenir de l'eau: laquelle decoupeure ſera treuuee gentile, & ingenieuſe, ſi la proportion y eſt exactement gardée. Mais encore il faut, pour mieux faire, que le verre ſoit long, à ſçauoir eſtroit par bas, & ſ'eſlargiſſant par le haut.

*Pour eſcrire au beſoing, contre un verre,
ſans diamant.*

CHacun fait aſſés la propriété du diamãt en pointe, pour grauer, & eſcrire ſur le verre: laiſſant à part ſes autres vertus, & propriétés, ſelon que les pierres precieufes en ſont diuerſement douées, ainſi que le grãd Albert, Euax,

Pline, Cardá, & autres auteurs renommés, les ont esclrites, (sans toutesfois auoir touché vn secret, quant au diamant, qui semble seul, effacer tout son lustre, & excellence, & lequel ie tailleray aussi pour ceste heure, de peur de l'abus.) Mais quant à sa vertu d'empraindre, & grauer sur le verre, tel nom, desseing, ou armoirie qu'on veut, par ce que tous n'en ont pas, vous pourrés encores faire cecy fort facilémēt sans diamant, en ceste sorte. Prenez vn gros caillou qui soit dur, & le iettez rudement, & avec grand' force, contre le paué, pour le rompre, & en faire plusieurs pieces menuës: parmi lesquelles choisirés quelque petit éclat qui soit poinctu. Et sans doute, vous en pourrez esclrire sur le verre tel nom que voudrez, sans qu'il vous faille emprunter la durescé du diamant.

*Pour rompre par grad' merueille vn baston, appuyé
de trauers sur deux verres, sans les
rompre, ou esbranler
aucunement.*

Posez sur vne table, deux verres semblables, & de mesme hauteur, distans l'un de l'autre de quatre ou cinq piedz: Puis posés de trauers sur les verres, vn baston de mesme longueur, qu'à peine les boutz s'appuyent sur le bord des verres, & ne faut pas qu'il soit gueres gros: mais qu'il soit le plus sec, moyssi, & vermoulu que pourrez treuuer: Et les assistans se tenans vn peu loing, pour ne remarquer trop exactement la qualité du bâton, (combien que toujours cecy sera treuue estrange,) frappez de toute vótre force sur le milieu du bâton, avec vn autre baston sec, gros, & dur, & l'autre se rompra par le milieu, sans q̃ les verres bougēt.

Pour faire soutenir vn petit bâton, sur le bord d'un verre.

Ayez deux petis couteaux, les plus semblables que pourrez choisir, & les attachez par la poincte, vis à vis l'un de l'autre, à vn petit bâton, de demy pied de lóg, pres du bout estât

les pointes oppofées l'une à l'autre : Puis approchez, & courbez peu à peu, le manche des couteaux, vers le verre, le taillant eftant contre le bois, iufques qu'aurez rencontré la proportion, & diftance requife, par le moyen de laquelle, & le contrepoix des couteaux, ainfin difpofez, le bâton appuyé tant foit peu fur le bord du verre, fe fouteindra, & demeurera fufpendu, fans tomber, nonobftant le pois des




couteaux, qui font à l'autre bout du bâton, ce qui ne fera fans quelque merueille, veu qu'il

ne pourroit tout seul , se pouuoir tenir sans tomber : Ce que voyez icy représenté par la figure mise cy-dessus.

Vne façon de lunettes de verre , qui tromperont la veüe, pour vne seule chose, en représentant plusieurs.

FAites faire des lunettes, de quelque piece de verre, qui soit fort espais, & de couleur verte, & d'un costé il faut qu'elles soient plaines, & vnies, & de l'autre esleuées en bossètes, ou faces, en la forme que voyez cy apres, ce qui se fera aisément, en les polissant, selon l'art de ceux qui font, & polissent les miröers, auxquels les ferez faire, ou à ceux qui taillent les pierres. Car tout autant de faces qu'il y aura, tant de choses elles représenteront à la veüe, pour vne seule. Tellement que celuy qui les aura au nez, ne saura iamais rencótrier du premier coup, & toucher du bout du doigt, vne piece de monoye, que luy aurez mise deuant, sur.

la table. Car il mettra le doigt tantost deçà, tantost de là, sans s'en approcher que de bié loing & avecq toutes les peines du monde, pour la pluralité des pieces qu'il verra, ne sachant à quelle courir plustost, ce qui ne fera, sans y auoir du passetemps.



Pour faire, qu'une espée, fichée par la poincte, au haut d'un plancher, viendra en tombant, frapper du pommeau directemēt, sur une noix qu'aurez mise en terre.

Fichez vne espée nuë par la pointe, contre vne poutre, ou soliveau, le plus droit que pourrez, & qu'elle ne tienne qu'un peu. Puis aprochez du pommeau vne pleine escuelle d'eau, à fin que le pommeau trempe en partie

dedans, & soudain retirés l'escuelle, aduisant
 bié en quel lieu tombera vne goutellette d'eau,
 qui se fera tenuë attachée au bout du pōmeau:
 car en ce propre endroit, vous faut mettre vne
 noix. Cela ainsi fait, hurtez vn peu avec vne
 lōgue perche, cōtre le foliueau, près de la poin-
 cte: & l'espée venant à tomber, donnera direc-
 tement sur la noix, la brisant, & mettāt en pie-
 ces. Mais il faut, deuant que d'appeller ceux, à
 qui vous desirez faire veoir cecy, qu'ayez a-
 presté tout vostre cas. Car ilz penseront, que
 ceste obseruation exacte de l'assiète de la noix,
 procede de l'assurance de vostre perspectiue.

*Pour faire, qu'ayant traßé avec vn compas, vne
 circonferance, puis rompant le compas, & de re-
 chef l'ouurant, vous remettez les bouts d'icelluy
 iustement, du centre dans la mesme circonferance.*

Prenez vn compas, & après l'auoir ouuert,
 en le tenant avec la main droicte, passez le

doigt indice dedans, iufqu'à ce qu'il fe refofe
fur le commencement de l'ouuerture, en l'en-
droit de telle ioincture du doit qu'il vous plai-
ra, felon que voudrez eflargir vofre compas.
Et alongeant le bras, regarderez les bouts d'i-
celluy, en fermant vn œil, comme fi vouliez
retenir la diftance de l'ouuerture: mais cepen-
dant noterez bien l'endroit où fe refofe fur
vofre doigt, l'ouuerture d'embas de vótre cõ-
pas: & ayant formé vne ligne ronde, avec ice-
luy, en l'eflat qu'il eft, le fermerés incontinent.
Puis le voulant remettre comm'il eftoit, l'ou-
urirez peu à peu, en tenant le bras eftendu, &
vifant de l'œil, pour couvrir vofre fubtilité,
qui eft, de paffer le doigt, comm'au commẽ-
cement, à trauers le compas, pour l'ouurir feu-
lement, autant qu'il eft de befoing, iufqu'à ce
qu'ayez rencontré fon repos, fur la ioincture
du doit, laquelle auiez nottée. Et incontinent
renuerfant les boutz du compas, vous verrez
qu'ayant mis l'vn dans le centre, l'autre ira tô-
ber iufte ment fur la circonferance.

Comme vous pourrez rompre vn caillou,
d'un coup de poing.

POSEZ vne grosse pierre en terre, l'asseurant si bien, qu'elle ne se puisse bouger. Puis prenez vn'autre pierre moyennement terue, & nō par trop espaisse, & l'appuyerez ferme, par vn bout contre terre, vn peu loin de l'autre : puis baissant l'autre bout de ceste pierre, l'appuyerez cōtre l'autre, avec vne petite piece de paille de trois trauers de doigt de longueur, en sorte qu'elle tienne suspendu ce caillou : sur le milieu du quel frapperez du poing, vn coup sec & ferme, ayant vn gand à la main si bon vous semble : & le trōçon de la paille cedāt au coup, fera que ce caillou rompra an deux pieces, hurant contre l'autre. Cardan recite, l'ayant prins d'*Olaüs Barbarus*, que le lard flambant ietté sur vne pierre, la rent tellement frágible, qu'on la peut aisément briser, & mettre en pieces : & y en à qui assurent, que par ce moyen il n'y a si dur caillou, qui ne se mette en poudre.

*Pour faire vn mouuement, qui sera de fort
longue durée.*

PRenez vn grand tranchoir de bois, & fichés
au milieu d'iceluy, vn couteau par la poin-
te, & faut que le tranchât tende en bas, & qu'il
soit fiché vn peu de trauers. Puis posez ce cou-
teau sur vn plain verre d'eau, le tranchant estât
renuersé par dessus, & à trauers le verre, si bié
que le tranchoir pende dehors, luy donnant
incontinent vne petite secouffe. Et verrez que
le couteau, par le contre-pois du tranchoir, cõ-
mencera de branfler, & battre, comme les mi-
nutes d'vn horloge: auquel mouuemēt il per-
sisteroit tousiours, (selon qu'aucuns m'ont as-
seuré,) si ces choses estoient disposées deuë-
ment: pour le moins il durera assez long tēps.
Il y-a bien vn autre mouuemēt perpetuel, du-
quel Cardan parle au chapitre qu'il a fait ex-
pres, *de motu perenni*, la où il se fert de l'Aymāt
bien qu'il se face, selon d'autres, avec le mer-
cure. Il y-a pareillement vne viz infinie: qui

font inuentions, & artifices mechaniques, consistans en certaines proportions, & dimensions Geometriques, qui à la verité sont du tout admirables, pour les effects incroyables, auxquels tels engins se peuuent heureusement adapter, selon que la dexterité de l'ouurier peut faire seruir la modelle d'iceux à tels vsages: & ainsi nous lisons qu'Archimedés, (auquel on attribue l'inuention de la viz sans fin,) traina par tout le marché de Syracuse, avec vne seule main, & d'vne seule corde, (comm'on feroit vne iument par le lycol,) vn grand nauire, chargé de marchandise: & desquels engins, & semblables, en pourrions nous encore mettre icy quelques vns. Mais par ce que ces choses serieuses, appartiennent plustost aux Mathematiques, qu'à ces subtilitez, & ieux de recreation, que nous nous sommes proposés en cest' œuure, nous sommes contens, pour ne nous égarer de nostre subiect, de n'en toucher pour ceste heure autre chose: mais passer au reste de noz petites gaillardises.

*Pour faire monter l'eau, contre-mont vne fiole,
ou en vn verre.*

Chauffez bien le cul de la fiole, puis renuersez promptement, & plôgez le col d'icelle dans l'eau: & verrez monter l'eau en-haut, tout le long du col de la fiole, estant attirée par la chaleur d'icelle. De mesme, si vous mettez vn papier enfagotté, & allumé, dans vn long verre, le renuersant incōtinent dans l'eau, elle montera aussi en-haut.

*Comment vous representerez contr'vne muraille,
les couleurs, & bigarreures de l'arc celeste.*

Ayez vne bouteille de verre, rōde par le vêtre, & plaine d'eau, & la mettez au soleil, en sorte que les raiz d'iceluy, frappans par derriere contre la bouteille, viennēt à donner cōtre la muraille opposite & verrez en icelle imprimée vne pareille bigarreure, & meslange de couleurs, que vous en voyez diuersifiées en nostre Iris, ou arc du ciel.


Composition d'un globe de curyure, ou leton, qui seruira de soufflet, pour alumer le feu.

FAites faire vn globe, ou boule ronde de leton, ayant vn pertuis petit, & tout rond: & le voulant emplir d'eau, pour seruir puis apres en vótre affaire, faictes en ceste sorte: car autrement il vous seroit impossible du tout. Soufflez dedás trois. ou quatre fois par ce trou & incontinent renuersez le globe dás de l'eau. De rechef soufflés dedans, le renuersant comme dit est: & reíterez cecy si souuent, qu'en fin le globe soit rempli d'eau, faisant chaque fois attraction d'icelle par le pertuis. D'autres font chauffer bien le globe, & le renuersent dans l'eau, laquelle est attirée, comme vne ventouse attire par la chaleur: car autrement cecy ne pourroit estre remply. Or si puis apres vous mettez ce globe au brasier, comme l'eau viendra à s'eschauffer, & bouillir, ne treuuant qu'un petit souspiral, elle se resoudra peu à peu en vne vapeur venteuse, qui bruyra, & soufflera, pour s'en seruir en guise d'un soufflet.

*Comme vn filet, qu'on aura veu blanc semblera
soudain changé en vn noir.*

PRenés vn de ces offetz de pied de mouton,
qui sont durs, & courts, ayant vn bout plus
côurt que l'autre, & rond, avec quelques rayes
selon qu'en voyés cy-apres la figure. Faites y
deux trous près des boutz qui trauerfent, afin
qu'à chaque bout il y ait deux trous, l'vn de çà
l'autre de là : par lesquels ferez sortir toute la
moëlle, les nettoyant le mieux que pourrez.
Puis prenez deux filetz de mesme longueur,
l'vn blanc, & l'autre noir: & passez le blanc par
le trou A. le fessant sortir par le trou B. de l'au-
tre costé de l'os. Apres passez le filet noir par
le trou C. de ce mesme costé, & le faites sortir
par le trou D. de l'autre costé de l'os. Cela fait
nouërez les deux boutz des filetz qui sont de
chaque costé, l'vn avec l'autre, à sçauoir A. D.
tout ensemble, & B. C aussi. Lors faisant cou-
ler l'os le long des filetz, si d'vn costé l'vn fil
est blanc, & l'autre noir, en faisant courir l'os à

reculons, celuy qui estoit blanc sera veu noir,
& le noir semblera changé en blanc, ce qui de
premier abord sera treuvé estrange: car on pé-
serra que le filet blanc passe par A. C. & que le
noir traaverse tout d'une fuitte par les trous D.
B. qui sont vis à vis l'un de l'autre: mais vous
voyez le contraire, & le chemin tortu qu'ilz
vont prendre.



*Pour couper vn filet, qui apres sera
treuvé tout entier.*

Prenez vn filet, près des boutz A. B. &
faictes passer le milieu du filet C. par le ply
D. si que les deux plis demeurent cachés sous
le ponce de vostre main gauche, & tenât l'au-
tre bout B. ensemble le filet, pres de F. avec

l'autre main, faictes couper à quelcun le filet,
entre E. F. puis laissant pendre les boutz B. F.
que vous auez à la main droicte, (tenant toutes-
fois cachez les plis avec le pouce de la se-
nestre,) noueres les boutz A.E. puis enuelo-
pant tout dans la main, soufflerés dedans, &
tirerez par vn bout avec la main gauche, &
avec la droicte ferez couler le noeud, lequel
tiendrés secretement dans la main, ou le laissez-
rés cheoir, sans qu'on l'apperçoie. Ou bien,
faites tenir le fil par vn bout, & tenezle, par
l'autre, avec la main gauche, & passés la droite
tout le long, pour emporter le noeud, mon-
strant apres le fil tout entier.



*Pour couper vn filet en plusieurs pieces, puis faire
sembler que l'ayez reioinct tout entier.*

Prenez deux filetz de mesme grosseur & longueur, & vous faut auoir secretement caché l'vn d'iceux, tout replié menu, entre le pouce, & l'indice gauche: & l'autre fil tiendrez par les deux boutz tout estêdu, le faisant couper par le millieu. Puis ayant assemblé les deux parties, les ferés encores couper par le millieu, & ainsi consequement, iusques qu'il soit couppé en menües pieces. Alors assemblerez toutes ces petites pieces, les remüant entre les deux doigts premiers de chaque main, sans qu'on voye le fil replié menu, que tenés caché sous le pouce, & indice gauche. Puis secretemēt prendrés les piecettes avec la main droite, faisant vn peu appañoistre le fil que tenés en la gauche, & en disant qu'il vous faut, pour reioindre ces pieces, vn peu de poudre d'oribus & de corne de lieure, (car ce sont les mots dont vsent ces habladours) metrés ceste main

en vostre poche, faisant semblant de prendre ces poudres mirifiques, & laisserés tomber dedans, les pieces du filet couppé, & faisant comme si ietiés de voz poudres authentiquement mirelifiques, sur le pouce, & indice de la main gauche, (où est caché le filet entier, & où on pensera que soient les pieces,) & tirant peu à peu le filet par vn bout, il n'y aura aucun qui ne soit estonné, de le voir tout entier.

*Pour faire voir tout entier, vn filet qu'aurez
bruslé à la chandelle.*

Lés vn peu de filet, à l'entour d'un petit baston, par vn bout, & par l'autre bout, en liérés tout autāt: & tenant les doigts sur le bout du baston d'embas, pour tenir caché le fil qui est lié desoubz, vous montrerés celuy qui est à l'autre bout lié, & le ferés brusler à la chandelle. Puis l'ayant monstré tout bruslé, ferés souffler à celuy que voudrés, sur ce bout: & incontinent ferés couler les doigts du long du

baston, avec le filet qui est dessous: & empoignant les cendres du filet brullé, de l'autre bout du bâton, & les frottant entre voz doigts, ferez semblant de vouloir remettre ce filet brullé en cendres, en son premier estat, montrant l'autre qui est entier. Ces messers eniauleurs debagoulét icy du *Matagot*, & *ferosa*, qui sont des motz inouïs, pour faire treüuer meilleur leur cas.

*Pour faire apparoystre dans vne fiole pleine d'eau,
comme la forme de villes, montaignes, & autres choses.*

PRenez le blâc de deux ou trois œufz, & l'ayant aucunement battu, mais nō pas qu'un petit, le ietterez dans vne grande fiole, ou bocal plein d'eau, de quatre pars les trois. Et vn peu apres vous verrés mōter en haut, du fondz de la fiolle, certaines petites vessies, & filamētz lesquels se lians, & meslās ensemble, (en tenāt la bouteille en quelque lieu cler,) vous repre-

senteront à la veüe, cōme des villes, châteaux, clochers, & telles autres choses semblables, avec de petis globes argentez, & luyfans ainsi que des perles, attachez au feste, ou pointe de ces bastimens.

Pour sçauoir par maniere de plaisir, quel est le plus homme de bien de la troupe.

IL faut, deuant que vouloir faire ceste gentillesse, qu'ayez plustost escript, avec vne plume nette, trépée dans vn peu d'vrine, ce mot **B O N**, sur le dessus de vōtre main, & qu'il soit seiché. Lors dites que vous voulez faire vne preuue, & essay admirable, pour sçauoir, quel est le plus homme de bien de la compagnie. Puis faites que chacun coupe vn morceau de papier, & qu'il escriue dessus de sa propre main, ce mot **B O N**, & vous aussi, en ferés de mesme deuant eux. Cela fait, dites leur que par trois fois, ils dient ces parolles, sur le morceau du papier, chacun sur le sien, & vous

aussi sur le vostre, afin que tout aille d'un mesme train: *Le plus homme de bien, le monstre sur sa main.* Puis que chacun brusle son papier à la chandelle, & que des cendres noires d'ice-luy, il frotte le dessus de sa main, les assurant, que par la force, & secrete vertu des motz profferés, le mesme mot de BON, se treuuera escrit, sur la main de celuy, (pour tesmoignage de sa bonté, & preud'hómie,) qui sera le plus hómie de bien. Mais ils auront beau frotter, & exorciser: car ce sera vous, que ce miraculeux, & fatidique oracle, tesmoignera estre plus honnestes homme, par l'impression visible de cest excellent mono-syllabe, qui sera veu sur vostre main.

*Pour r'allumer fort subtilement, vne
chandelle qu'aurez estaincte.*

ALlumés vne grosse chádelle, & la laissés vn peu brusler, afin qu'elle assemble au bout du cotton, cōme vn petit charbō de feu.

Puis

Puis tenant voz deux mains ioinctes, comme pour prier Dieu, (mais i'entés les doigtz bien iointz l'vn à l'autre,) tenés bien pressé, entre le doit du milieu, & l'anelier, du tout au fondz, vnfort petit lopin de papier, retors par vn bout & que par l'autre bout, au dedans de la main droite, il sorte vn peu hors: mais sur tout, gardés que par le derriere de la main, on ne voye point sortir l'autre bout que tenés pressé, & tenez les mains ioinctes comme dict est, & les doigtz ferrez l'vn contre l'autre: en sorte toutesfois qu'il y ait embas vn'ouuerture, & entrée vn peu large. Lors baissant lesdeux mains à la flamme de la chandelle, faisant semblant de dire quelques parolles, les passerez à-demy ioinctes, & les doigtz ferrés, sur la flâme de la chandelle, si bien qu'elle entre dans le millieu des mains, pour allumer le bout du papier: puis leuant les mains en-haut, soufflés dessus, & l'estaignés: & à mesme instant, baissés encores les mains sur la chandelle estainte, pour faire prendre le feu du papier



allumé, au bout du cottō, auquel le feu se tiēt encore, & sera incontinent r'allumé de passade. Mais il ne faut poinct vser en cecy de remises, ains y aller de suite. Cela faiēt ayant leuē soudain les mains, esteignez le petit papier, le quel tenez en la main droicte, le faisant perdre qu'on ne s'en apperçoie aucunement. Ce qu'on ne pourra nullemēt descouurir, si tenēs les doigtz bien ferrés, & que faciez seulement cecy vne fois ou deux, en plain iour: afin que le faisant de nuit, la lueur du papier allumé ne se voye par-entre les doigtz.

Comme vn filet demeurera dans le feu, estant lié à l'entour d'un œuf, sans brusler.

Liez vn filet à l'entour d'un œuf frais, & y ayant faiēt vn nœud, coupez le reste du filet superflu: puis mettez hardiment l'œuf dans la flamme, ou au milieu des braises: car le filet ne sera nullement endommagé, estāt cōserué par l'humidité, qui est attirée hors des

pores del'œuf, avec la violence du feu. Ce qui pareillement aduiédra, par vne mesme raison, si liez le filet à l'entour d'une pomme,

Comme vous pourrez faire subtilement, que frappât sur vn bonnet, soubz lequel aurez mis vn œuf: l'œuf sera veu apres tout entier.

Prenez vn bonnet de nuit, fait à la Turquesque, c'est à dire, ayant la forme haute, & large par-bas: & cousez par dedás, au costé, comme vne petite pochette. Puis faites vous apporter vn œuf, & ayant posé le bonnet tout droit sur la table, couuerte d'un tapis, & en faisant semblât de mettre l'œuf desoubz, vous le cacherez adextrement, & d'une main habile, dás le petit secret qui est à costé. Après frapperés d'un grand coup de poing sur le milieu du bonnet, destournant le coup, &, si ainsi faut dire, esquiuant du costé où l'œuf est caché, de peur de faire à bon esciét: puis ostant le bonnet, on sera tout esbahy de ne voir l'œuf de-

soubz, ne sçachant ce qu'il est deuenu. Lors remettant le bonnet, faiçtes tomber tout-bellement l'œuf sur le tapis, pressant avec le pouce contre la pochette, & de rechef ostés le bonnet, monstrant l'œuf tout entier, comme il estoit au commencement.

Pour cuire vn œuf sans feu.

ENterrés vn œuf dás de chaux viue, & iettés de l'eau dessus, & quád la chaux aura bouilly, & fumé, & que sa chaleur sera passée, vous treuuez l'œuf cuit, l'ayant desenterré. Cardan à voulu dire, qu'estant mis dans vne fonde, & tourné de roideur vn peu longuement, avec vne prompte circulation, il se peut cuire par ce moyen competement, *fides sit penes authorem* : car cela ne me semble pas vray-semblable, mais plustost absurde, & ridicule, (*pace tanti viri dixerim*;) ou il y faudroit bien multiplicité de tours, & tourdiõs, & autāt de mains, pour infatigablement tourner, & tordionner,

auec vne grande rapacité, celerité, hâtiueté,
roideur, promptitude, & vifteffe.

*Pour faire monter vn œuf en-haut, le
long d'un baston.*

PRenés vn œuf le plus rōd que pourrés choi-
fir, & qui ne soit gueres gros, & faites creu-
fer des deux costez pardedans, vn baston de fé-
hu, ou fuseau, qui soit my-parti, en la façon
du bois d'un canon d'harquebuse: & faut que
le creux soit tout du lōg aussi large, que l'œuf
estant mis entre-deux iusqu'au fondz, puisse
s'y reposer. Puis l'ayant ainsi colloqué entre
les deux moytiés du bastō, iusqu'au fōdz, si biē
qu'il demeure appuyé près de la main droicte,
& tenant le baston à pleines mains, vous vous
tournerés roide deux ou trois tours avec le ba-
ston: & indubitablement l'œuf montera subi-
tement aux boutz du baston, la-où plustost
vous aurés mis quelque chose pour le retenir,
à fin qu'il ne faute du tout dehors: lors estant

au bout, treuuât là vne barriere, ou empeschement, ausi tost que vous vous reposerez, il retournera au lieu d'où il estoit venu. Il en y-a qui escriuent, que l'œuf estant vuidé, puis répli, par ce mesme trou, de rosée du mois de May, recueillie aueq' vne esponge, après exposé aux rais du Soleil, mettant vne longue perche en pente contre l'œuf, qu'il montera peu à peu tout du long, estant esleué par la chaleur du Soleil. Ce que ie ne puis bonnemét croire, bien qu'à la verité il y ait de l'apparèce: & parce seulement que ie ne l'ay point essayé, ie fay conscience de l'asseurer. Il y-a bien des personnes dignes de foy, qui m'ont asseuré, auoir treuvé par effect la chose tres-veritable: mais qu'il faut estre aux chāps, sur le coupeau d'un tertre haut esleué, & comme le Soleil se hausse apres son leuer, mettre l'œuf au pied d'un baston assis en pente, en sorte que le Soleil en montât, vienne frapper contre l'œuf: asseurant que par ce moyen il montera doucement. Ce que ie treuve plus approchant de la verité, y estât les

circonfiances mieux obseruées, & la disposition des choses plus exacte : m'en remettant, quoy qu'il en foit, à l'experience, qui en est assez aifée.

Pour mettre vn œuf dans vne fiolle, ou bocal de verre, sans casser l'œuf n'y la fiolle.

Prenez vn œuf, & le faites cuire dur: puis le mettés tremper quinze ou vingt iours, dās le plus fort vinaigre que pourrez treuuer : & vous verrés que l'œuf s'attendrira, & amolira là dedans, avec sa coque, de sorte qu'avec la main vous l'accourcirés, ou alōgerés, cōm'il vous plaira, & ainsi le ferez doucement entrer par le col de la fiolle. Apres la remplirés d'eau fresche: & dās moins d'autres quinze, ou vingt iours, l'œuf retournera en son premier estat, avec admiratiō de ceux qui le verrōt là-dedās.

Pour danser, & cheminer, en portant vn œuf suspendu du contre vostre face.

Prenez vn œuf, & ayant fait par les boutz, deux trous fort petiz, & desliez, soufflés chāque fois par là, & fouillés dās iceluy, avec vne vergette deslyée, à fin de vuidier peu à peu, (en reſiterant cecy,) tout ce qui eſt dedans, encore qu'y demeuriez aſſez longuemēt: car les pertuis veulent eſtre les plus petiz qu'il ſera poſſible. Après, les boucherés fort proprement, avecq vn petit de craye blanche, ou ceruſe en poudre, deſtrépée avec vn peu de blanc d'œuf à fin que ceſte fermeure artiſcielle, iinit au pl^r près, la couleur naturelle de la coque de l'œuf & que les pertuis ne ſe cognoiſſent. Cela ainſi accōmodé, prenez vn autre œuf, le plus ſemblable que pourrés choiſir, lequel faut que vous faciés bailler, & le choiſir parmy d'autres à vōtre aïſe deuant tous, & tenant caché dans la poche l'œuf vuide, mōtrés l'autre, à fin qu'o le manie, & contemple. Puis voulant faire cecy, prenez ſubtilement le premier, & l'ayant mouillé du bout de la langue, par le coſté non percé, (qui doit eſtre le plus large,) le poſerez


par là, contre le derriere de l'oreille, ou contre le coing de l'œil, ou bien cōtre le costé du nez, le pressant vn peu, & incontinent il se prendra en ces parties là, cōme s'il y estoit collé. Tellement que pourrez cheminer, voire dāser, en le portant ainsi suspendu. En fin l'ayant serré, & mis en poche, supposerez l'autre, & cōme feignant auoir oublié de le leur rendre, le leur baillerez pour le veoir, & contempler encore à leur aise. Car ce qui fera treuuer beau ce ieu, c'est, si on pense q̄ faciés cecy avec vn mesme œuf, treuuāt estrange, quand apres vous auoir veu faire cecy, on ne le saura faire apres vous.

*Pour faire sauter, & danser vn œuf dans vn pot,
& luy faire faire plusieurs soupplesses.*

PRenés vn œuf, & ayāt fait vn trou, au plus gros bout d'iceluy, iettés par là, tout ce qui sera dedans, en fouillant chāque fois avec vne vergette, & le laués qu'il soit bien net. Puis prenés vn rondeau de liege, de la grādeur d'vne

grande iocōdalle, fichât en quatre diuers lieux d'iceluy, quatre petis morceaux de plomb, pour seruir de cōtrepoix au rondeau, en ce que tantost nous monstrerōs estre de besoin, pour nostre affaire. Au milieu du rondeau ficherés vn petit baston, de la grosseur d'vne plume de cygne, & de longueur de demy pied, & au milieu lierés, & attacherés avec vn peu de filet, quatre ou cinq poilz noirs de la quēue d'vn cheual, nōuez proprement l'vn à l'autre, en coupât le reste du poil superflu hors le noeud: & au bout de ces poilz, attachés vn petit morceau de liege, pour pouuoir seulement tirer cest engin par là, comme dirons apres. Puis faites pointu l'autre bout du petit baston, & près d'iceluy, faictes vne petite fente, à trauers de laquelle ferés passer vne petite paillete, ou vergette de bois, fort mince, & courte, pointüe par vn bout, & attachée par l'autre, avec vn filet de quatre doigts de long, pour la pouuoir tirer par là, ainfin que monstrerons tout cecy clèrement, tant par ce discours, que par la re-

presentatiõ de toutes les parties de cest engin,
qui sont mises apres. Faites donq entrer ceste
petite cheuille, ou vergette, dans la fente du
baston, baissant la poincte d'icelle, quand elle
sera dedans, & haussant le bout ou est le filet,
afin que par ce moyen le bout du baston fen-
du, puisse mieux entrer dans le creux de l'œuf,
par le trou d'iceluy, car autrement si vous ne
retiriés ainsi la cheuille, il se feroit trop grand:
puis tirés incontinent tout doucemēt le bout
de la cheuille, par le bout du filet, afin qu'estāt
abaissée, elle soit par ce moyen afsise de trauers
dans l'œuf, pour retenir l'œuf, qu'il ne sorte
de là en sautant, & garder que ce beau mistere
ne soit descouuert, qui merite à la verité estre
faict exactemēt, tant il sera treuue beau & de-
lectable. Car au reste, ie ne pense point estre
possible de plus viuement représenter cest ar-
tifice, par toutes les pieces, ne plus facillemēt,
que ie l'ay descrit: si bien qu'on le pourroit ai-
sémēt comprendre, encores que ie n'en misse
après aucune figure, si on le veut seulemēt lire



auq' attention. Or ayant donc ainsi préparé vostre instrumēt, le vous faut porter ainsi tout prest en la poche, dans vn estuy, ou boēte de mesme longueur, & pour le pratiquer, si cest de iour, il faut que ce soit dans vne chābre qui ne soit pas trop clere, ou qu'il n'y aye fenestres sinon d'un costé, & qu'elles vous soient derriere, & le pot deuāt vous: car la clarté du iour, frappāt directemēt sur le poil qui iouēra tantost, le feroit veoir. Que si c'est de nuit, vous le ferēs encore plus heureusement, & avec tāt plus grande assurance, près de la table, à la faueur des chandelles, sans que leur clarté decouure le cas, sinō qu'elles fussent tout-cōtre. Faut aussi que les spectateurs se tiennent vn peu escartez en rond, deuāt vous, pour ne vous troubler aucunement. Toutes ces particularités obseruées, faites vous bailler vn œuf, & vn pot d'estain large de bouche: puis apres, priés la cōpaignie, de vouloir vous faire place, pour vn peu, afin que sans aucū empēchemēt, puissēs appeller vn esprit familier, pour l'enfermer

dans l'œuf, qui vous à esté baillé: par la force & vertu duquel, l'œuf se rende prompt executeur de voz commandemens. Et lors s'estans retirés, vous mettrés l'esprit dans le pot, c'est à dire l'œuf que portez tout prest dans la boëte, lequel vous poserés, & agencerés avec son artifice, en sorte qu'il se tienne tout droict au fonds du pot, & attacherés le morceau du liege, auquel se tient le bout des poilz, souz vötre iarretiere, du costé de la iambe droicte. Et ayät posé le pot descouuert, en l'endroit que luy auies au commencement destiné, vous reculérés peu à peu, iusques que sentirés que le poil demeure tendu à vöstre iambe, pour faire remuër l'œuf du pot, & marquez bien ce lieu de vöstre demeure, tant que vöstre ieu durera. Cela faißt, ayant r'appellé toute la brigade ioyeuse, vous tenant prés du pot, avec l'œuf à la main qu'õ vous auoit baillé, apres le leur auoir baillé à manier, s'ils veulent, le mettrés doucement en leur presence dans le pot, avec les solennités & ceremonies requises, vous faisant

incontinent bailler vne espée nue, laquelle tenant à la main, (apres les auoir fait tous reculer, & renger en rond deuant vous, cōme dict est, & vous estre reculé peu à peu, iusques au lieu marqué de vostre demeure,) ferés avec la pointe de l'espée vn cerne à l'entour de vous, (gardant bien de ieter l'œuf dehors, en tendāt trop le poil.) Puis tenāt l'espée à la main, murmurant, & grondant entre voz dentz, vous cōmanderés à l'œuf qu'il monte, & se mōstre en l'air hors du pot, à-demy, deuant la compagnie, luy faisant deux ou trois commandemens reīterés: apres lesquels remūerés vn peu le iarret, & lors on entēdra remūier l'œuf: lors vous dirés qu'il se prepare pour desloger, afin de vous obeīr. Et incontinent repliant vn peu plus la iambe en arriere, le poil se tendant, fera monter l'œuf visiblement, & se tiendra là en l'air: puis l'ayant salué pour sa bien venüe, luy commanderés, en le menassant de l'espée, de s'en retourner, & à mesmes instant, (auançant le moins du monde la iambe, & le bras qui

menace,) le poil se lâchant, en fera retourner l'œuf. Puis de rechef l'ayant r'appellé, & fait remonter, luy presenterez la poincte de l'espée à baiser, en signe d'hōmage, & obeissance, & à mesure que vous alongerez le bras, & ieterez le corps en auant, il faut necesserement que la iambe se plye en arriere, faisant par cōsequent tendre le poil, & monter l'œuf: tellement que la pointe de l'espée ne fera plustost sur la bouche du pot, que le bout de l'œuf ne ioigne de contre, cōme la baissant, puis l'en ferez tetourner vsant de voz menaces. Et l'appellant encore, pour monstrier à la compaignie s'il est honnesté, & bien appris, l'ayant fait monter, & se tenant droit hors du pot, commandez luy de saluër les afsistans, avec vne humble reuerence, comme il vous la verra faire: lors faisant vne petite reuerāce de vostre pied, & à mesure que vous la remettrez en sa place, l'œuf se hauffera, & baissera de mesmes, avecq'vne merueilleuse grace: & vous leur protesterez qu'il fait ses reuerences, comme il sçait les faire, en

matiere d'œufs. Finalement l'ayant chassé, & fait encore remonter, luy cōmanderés, pour resiouir à son despart vne si belle compagnie, de danfer au son de vostre chanson. Lors ayant laissé l'espée, faisant sonner voz doigtz, chantés tel branle, ou gaillarde que voudrez, accordant la voix avec le son des doigtz: & cōme vous remuères la iambe, faisant vous mesmes semblant de danfer, l'œuf ira tantost vite, tantost lentement: maintenant en-haut, & puis embas, imitant, & suyuant si bien toutes les poses, & cadences de vostre chanterrie, qu'il n'en faillira pas vne: pourueu qu'ē cecy, & en tous les autres petits tourdions, vous le sçachiez bien conduire, & iouer du pied com-m'il faut: ce que vous ferez, apres vous y estre pluſtost vn peu façonné, & excercé. Et apres tout, l'ayant congedié, vous vous approcherez du pot, pour tirer hors l'œuf, qu'on vous auoit baillé, & qu'on pensera auoir fait tous ces petitz tours: puis le leur ayant baillé, pendant qu'ils s'esbatront à le contempler, & rire de

de ceste gentillesse, vous irez bailler congé à vostre esprit qu'auiez appellé, ainsi q̄ ferés croire aux moins leurrez:& lors estât à l'escart, r'enfermerez vostre artifice, laissant courir tousiours, si m'en croyez, l'eau contre-bas, & laissant passer, (comme lon dit,) les plus chargés.



*Pour faire vne chandelle, qui fera peur à ceux
qui seront à table.*

Prenez vn petit baston, de la longueur que voudrez faire vostre châdelle, & de la grosseur d'une plume de Cygne: & au tour du baston, faites vn canon de papier, lequel lierez par vn bout, & l'emplirez de poudre à canon vn peu batuë, & liez ce canon, ainsi qu'on fait les sauciffes: car il fera autant de petz sur table, comm'il y aura de liaisons. Après mettés vn peu de mèche de cotton dans ce canon, à scauoir enuiron la largeur de deux trauers de doigt pressant, & foulant la poudre, avec vn poinçon au tour de la mèche. Puis coulés autour du baston, autât de suif, ou de la cire, qu'il en faudra pour donner à cecy, la forme d'une chandelle, laquelle estant seichée, & acoutrée, mettez bruller sur table: & verrez, quand ce viendra à la poudre, le bruit qu'elle fera, & s'esteindra soudain après, faisant peur à toute la compaignie. Adonc pourrez faire ce que voudrez sur la table.

*Vne lumiere, qui rendra les personnes passées,
& des faitz comme mortz.*

T Rempez vne poignée d'estouppes en eau de vie, & meslez parmy, vne poignée de gros sel: puis mettez cecy dans vn plat, & la nuit l'allumerez, approchât la flambe d'une chandelle decontre: & promptement, ayant estaint tout autre lumiere, mettés ceste-cy deuant les asistans: & ils feront si pasles, maigres & affreux, qu'ils se feront peur, s'entre-regardant l'un l'autre. Et si ceste lumiere est posée au milieu de quelques vns, rengez en rond, & qu'ils facent des gestes, & contenance tristes, des mains, & de la teste, croisans par fois les bras, ilz sembleront encores plus effroyables. On ne peut lire dans la magie naturelle de Baptiste la Porte, vn' autre lumiere, de vertu pareille, composée de cire vierge, putrescée d'vn fumier. Mais par ce qu'elle n'a nulle apparence de verité, & qu'elle semble fabuleuse, (comme plusieurs choses qui sont dans ce liure,) ie me contenteray de ce seul moyen, qui est veritable, comme vous la treuuez telle, par l'experience qui en est aysee.

Pour faire veoir la nuit, non sans effroy, vne lumiere cheminant par la chambre.

Prenez vne, ou plusieurs tortües, & attachez sur leurs coquilles, de petits tronçons de chandelle de cire fort desliée, qu'on appelle vulgairement, bougie: les laissant aller la nuit par la chambre, & elles trayneront, avec leur tardif mouuement, ces lumignons & chādeletes, lesquelles on pēsera veoir cheminer d'elles mesme. Ce qui donnera de l'effroy, principalement s'il y-a des femmes dans la chambre, par ce que de leur nature elles s'effrayent facilement à la moindre occurrence, ou visiō extraordinaire: principalement la nuit, qui est mere de la peur, & fauorable à ces badineries. Si vous laissés aussi aller cecy de nuit, par les cymetieres, le vulgaire lourdaut cuidera, que ce foyent quelques ames des trespasés, des espritz, lutins, ou fantosmes: comme il n'a fa teste que trop farcie, & imbeüe de ces sottes opinions.

Pour faire vne lanterne, dans laquelle on verra, à la clarté de la chādelle, des cheualiers, & soldatz de guerre, alans & venans.

FAictes faire premierement la lanterne, vn peu longue, & quarrée, d'vn palm & demy de tout quarré, avec vne porte, le tout de listeaux, couuertz de papier deslié, huillé par dedans, & par dehors, avec huile de noix. Et faut que dessous il y ait comme pour baze, vne piece de bois, ou ais quarré, & vn'autre par dessus pour le couuercle, avec vn trou rond, & assez large au milieu, pour faire exhaler la chaleur de la chandelle, à fin qu'elle ne brusle l'artifice qui est caché dedās: & faut que ces deux ais soient enchassez aux boutz des quatre listeaux, haut & bas, qui constituent les quatre coings de la lanterne: mais notez, qu'il faut que le bois d'en haut soit tellement enchassé, qu'il se puisse leuer, & oster cōm'on voudra. Pareillement, plustost qu'enchasser l'ais d'en bas, il y faut ficher au milieu, vn bout de fer,

tout rond, pour seruir à mettre vne chandelle
d'assez gros calibre. Et tout-contre attacher
vne barre de fer, par deux replis qu'elle doit auoir,
auec deux clous, & que la barre soit de la
grosseur d'une plume grosse pour escrire, &
pointüe vn peu par le bout d'en haut, ataignant
en longueur, deux grandz doigtz près de l'ais
d'en-haut. Et attachés encores au bout de la
barre, auec du filet, vne aiguille à coudre, la
pointe tournée en haut, la liant bien à l'en-
tour tout du long, excepté vn peu de la poin-
te que vous laisserés sortir dehors. Et ne faut
pas enchasser l'ais, seruant de couuercle, que
n'ayez plustost mis & caché dans la lanterne
l'artifice qui s'ensuit, qui est le conducteur de
cest affaire. Prenez donc vn fondz de ces grā-
des böetes où on tient la dragée, de la grādeur
à peu près requise, pour pouuoir tourner sans
empeschement dans vostre lanterne, & fai-
ctes au milieu vn petit trou rond, de la gran-
deur d'un fou. Puis prenés des cartes de lyon,
dont on iouë, & les couppés chacune en deux

parties tout à trauers, en forme de deux papiers qu'on taille pour la fermeure des lettres, poinctus par vn bout, & larges par l'autre, & que chacune piece soit taillée esgalement, arrondissant vn peu avec des ciseaux, les costés larges, laissant vn des angles entier, & ostant avec les ciseaux l'autre angle, (en faisant la roigneure,) à fin que de ce costé, le papier aye cōm'vn ventre, en guise du tranchant d'vn couteau sans manche, large, & poinctu. Fendés, & entr'ouurés vn peu tout du long, le costé long & vny de ces pieces, à fin que chascune aye deux bordz, ou replis égaulx, l'vn de çà, l'autre delà, pour seruir de siege, à fin de pouuoir coller par là, & asseoir en rond, ces pieces de carte à l'entour du fondz de vostre boëte, posant le bout pointu près du trou, & celuy qui est rond & large, vn trauers de doigt près de la circonférence de vostre fonds de boëte: mais en collât ces cartes, vous les replierez vn peu en rond, vers l'endroit large d'icelles, & faut qu'elles soient posées avec vn peu de distance entre-

deux, à fin qu'estans ainsi accommodées, ceste rouë semble aucunement celle qui faict tourner la meule d'un moulin, receuant l'eau par des fossettes, & destours presque semblables: car aussi, la fumée de la chandelle s'entonnât dans ces cachots, qui sont formez, (comme dit est,) de la suite, & disposition des cartes, fera tourner ceste rouë. Cela faict, attachez contre le rondeau du fonds de la böete, des petitz listeaux desliés, faicts de ce bois tenue, qu'on met dâs les foureaux des espées, de la largeur d'un petit trauers de doigt chascun, & distans de trois doigts l'un de l'autre, tout autour du bord du rondeau, & qu'ilz descendent en longueur, depuis la poincte de la barre de fer, iusques enuiron deux doigtz près du fondz de la lanterne: & au bas desdictz listeaux, attacherés en rōd, yne ceinture, ou petit cercle de mesme largeur, faict de ce bois tenue, qui est à l'entour du fondz des mesmes böetes, où on met la dragée: & trois doigtz plus haut en attacherés un autre semblable, à l'entour des listeaux

descendans, & ainsi en y mettrez tousiours en montant, par égales distances, autant qu'il en fera besoing. Puis disposés contre ceste petite machine, vers le haut d'icelle, quatre hommes à cheual, faiçtz de carte, ou de ce papier fort lequel les marchandz mettent entre les draps: tenās chacun la lance à l'arrest, sauf le premier qui tiendra contre la bouche la forme d'une trompette: & faut que les iambes de deuāt se leuent, pour representer vn cheual qui bondit, & que ces caualleros ayent la salade en teste & les collerés cōtre les listeaux, distātz également l'un de l'autre. Au milieu, poserez de meisme, quatre harquebusiers morionnés, & l'espée au costé. Plus-bas encore, rengerés quatre piquiers, entre-mellant, si voulés, quelque leurier courant après vn lieure, ou telles autres fantasies. Ce que ferés tailler à quelque barbier, car ils sçauent ceste gaillarde maistrise sur le doigt, & ce sont eux aussi qui tiennent communement de ces lanternes, la nuit, cōtre leurs chassiss, pour amuser les passans, à cō-

templer l'ordre de ceste gendarmerie. Pour donc faire iouer cest engin, couppés le cul d'une petite bouteille d'un liard, tout en rond, y passant la poincte d'un morceau d'esmeril, avec lequel ceux qui font les vitres de verre, le couppent par où ilz veulent: & mettés ce cul de fiole, sur la poincte de l'aguille attachée au bout de la barre de fer. Et mettés dessus cecy, l'instrument susdict, en sorte, qu'estant le rondeau du fondz de la boëtte, assis par le trou du milieu, sur le cul de la phiole, le bout pointu d'iceluy passe hors le trou du rondeau, & que l'autre costé de la machine descende embas, deux trauers de doigt près de lais, ou enuiron, (ainsi qu'à esté dict cy deuant,) demeurant la verge de fer, au milieu, & aussi le bout du fer, seruant de chandelier. Toutes ces choses ainsi acheuées, selon qu'elles sont fort facilement descriptes, posés maintenant l'ais d'enhaut de la lanterne, & l'enchassés dās les quatre boutz des listeaux d'icelle, puis la posés en tel lieu que voudrés, l'appuyant, & estançonant si bien

qu'elle ne pende d vn costé ny d'autre. Et lors ouurés la porte de la láterne, & avec vne alumete mettés le feu à la chandelle, refermant la porte, quand verrés le feu bien épris: mais notés qu'il ne faut pas que la chandelle aye plus d vn tiers de long, eu esgard à la longueur de la lanterne. Lors la flamme, & la fumée montant en haut, & s'entonnant dans les destours, logettes, & concauités de vostre rouë artificielle, la fera tourner, & par consequent tous les champions qui sont à l'entour: estant aydée, & facilitée en la celerité de son mouuement circulaire, par le cul de la fiolle: car estant poly, selon la nature du verre, il coulera aisément sur la poincte de l'aguille, emmenant quāt- & soy tout le reste qui est appuyé dessus. Or ce sera icy le plaisir, de voir à trauers du papier à la clarté de la chandelle, les tours, & passages drus de ces braues guerriers, sans rōpre iamais leurs rangz. Mais sur tout gardés bien, pour vne precaution tres- necessaire, que par quelque empeschement, ce mouuement ne s'arreste:

de peur que le feu ne se prenne aux estoupes, en danger de combustion militaire : car ce seroit grād dommage, de perdre si pouurement tant de braues hommes.


Pour faire disparoistre, vne piece d'argent, qu'on aura mise dans vne böete: puis l'ayant faiöte reuenir, la faire après sembler fondüe.

FAites faire vne böete de buix, ronde, & löguette, cōme la voyés marquée cy après, A. dans laquelle en entre vn'autre marquée B. en sorte qu'estans ioinötes proprement l'une à l'autre, il semble q̄ de ces deux ce ne soit qu'une Et faut que la böete B. aye seulement vn iet, ou petit rōd esgal à la superficie de la böete A. & que le reste du bois soit diminué, & abaissé tout le lög, & à l'entour, pour pouuoir mieux entrer, & s'enfoncer dedans, à fin qu'estans A. B. ioinötes ensemble, elles ne semblent qu'une comme dit est. A quoy aideront encore les filetz que voyés représentés, deux à deux, tout

autour, deux desquels s'entre-rencontrans en haut, couuriront, (comme voyés,) la conionction des böetes. Mais il faut, qu'entre-deux vers le bas, il y ait quelque petite distance, à fin que mettant la piece d'argent au fondz de la böete A. (ainsi que monstrerons tantost,) la böete B. estant enfoncée dedans, iusques au iet, ou bord d'en haut, la piece d'argēt aye vne espace vuide, pour pouuoir demeurer cachée entre-deux. Cela faiët, mettés par dessus ces böetes ainsi ioinctes, vn couuercle de cuir moyennement espais, cousu en rond, tout d'une venue, & fermé d'un rondeau de gros cuir par hault, & ouuert par bas: & faut qu'en couurant les böetes, il descende iuqu'au fondz d'icelles, prés du pied. Or voulāt faire ce ieu, pour monstrier premieremēt vne seule böete toute vuide, la tenant avec la main gauche, leuerés le couuercle, en pressant bien avec les doigtz de la main droicte, vers l'endroit de la conionction des böetes, à fin d'emporter B. quant- & le couuercle: la bouche duquel tenāt tournée

embas, (de peur qu'on ne voye la boëte qui est cachée dedans,) monstrez l'autre, à fin qu'o la voye simple, & vuide. Puis faictes mettre à quelqu'un, dans ceste-cy, vn real, teston, ou autre piece, & mettés par dessus incontinent le couuercle, à fin que par mesme moyen l'une r'entre dans l'autre. Et après auoir fait souffler dessus, enleuerés doucement le couuercle, sans presser des doigts, à fin que A. B. demeurent l'une dans l'autre. Lors ferés veoir, cōme dans B. il n'y a rien: tellement qu'on sera bien esbaï de veoir la piece esuanouye, estimant veoir tousiours vne mesme boëte. Apres remettés le couuercle dessus, puis ayant faict vn tour de main en l'air, (comme si vouliés r'appeller la piece pour la mettre dedans,) osterez encore le couuercle, pressant des doigts, à fin d'emporter B. & renuersant A. sur sa main, il sera aussi estonné de veoir la piece dessus, que s'il estoit tombé des nuës. Puis faites remettre la piece dans A. & allés mettre secrettement dans B. vn peu d'argent-vif, melleé avecq' autant de li-

meure d'estain qu'il en faudra , pour faire vne
paste , ou amalgame , recachant ceste boëte
dans le couuercle , & la réuerfant avec le cou-
uercle, subtilement dans l'autre. Puis ayant fait
encore souffler l'Alchimie , osterés bellement
le couuercle , sans presser les doigts , à fin que



les deux boëtes demeurans enchassées , vous
faciez veoir dans B. l'amalgame, qui semblera

en le manyant, estre la piece fondüe. Finalement, ayant remis vostre couuercle, puis encore l'ayant osté, en pressant les doigts pour emporter B. mōstrerés dās A. la piece, aussi entiere qu'au parauant: ce qui ne fera sans merueille.

Cōme en feuilletant vn mesme liure, lequel on verra tout blāc: à mesme temps vous le ferez veoir peint de diuerses, & estranges figures.

IL n'y-a celuy qui voye pratiquer ceste subtilité, qui ne la treuue admirable, iusques à faire croire à quelques vns, qu'il y-a du charme. Quant à moy, la premiere fois que ie vis cecy, i'en loüay fort à part moy l'inuention, sans toutesfois me laisser gagner à l'opinion vaine du vulgaire, pour ne m'esbranler de la mienne, qui tend à vne resolution toute contraire. Faites donc faire vn liure de papier blāc qui aye bon corps, & faut qu'il soit de deux mains, relié de toute la grandeur de la feuille: puis faictes comme s'ensuit. Roignez du premier

mier fueillet près du bord, vne petite piece, de la largeur du tail d'un tranche-plume, peu ou moins, commençant de haut, & que la roigneure finisse en poincte, vuidée à trois doigts, ou enuiron, près le milieu du fueillet : puis en rognés. vn'autre piece de mesme, commençant embas, & finissant en poincte de ce costé, à deux doigts près du milieu du fueillet, à fin que par ce moyen, les trois doigts du milieu de ce fueillet, passent plus que le reste d'iceluy, comme voyez en la premiere figure, des quatre, qui sont représentées après. Du second fueillet osterés vne roigneure entiere, tout du long, d'une pareille largeur. Du troisiésme osterés vne roigneure, la cōmençant en pointe, à trois doigtz près du bout d'enhaut, & l'acheuant de couper en largeur, iusqu'embas, tout outre. Du quatriésme osterés la roigneure entiere, tout du long. Du cinquiesme, leuerés vne roigneure, la commençant au bout d'enhaut, & l'acheuât en poincte à trois doigtz près du bout d'embas. Du sixiesme, osteriez derechef

vnepiece tour du long tellement, qu'en tout il n'y a, comme voyez, que quatre façons de decoupeures aux fueillets, ainsi que vous les voyez figurées. Car puis apres il faut tousiours continuer de decouper par ordre, & de suite, (en recomençant,) tout le reste des fueillets suiuan, sans vous faillir. Or ayant acheué la coupeure de vostre liure, vous escrirez vn petit, a, sur le premier fueillet qu'auuez couppé, le posant au coin du fueillet à l'escart, pour seruir seulement de marque, en ce que dirôs puis après. Au second fueillet ne mettez rien. Au coin du troisiésme, mettez vn b. au quatriésme, rien. Au cinquiésme, vn c. Au sixiésme, rien. Puis au septiésme mettez derechef vn a. Au huietiésme ne mettez rien: & ainsi iusques au fonds, comme deuant. Ayant ainsi marqué le liure de ce costé, le retournerez de l'autre, lequel doit commencer par vn fueillet, qui aye sa roigneure tout du lōg, & à ces fins arracherez, & osterez les autres fueillets, qui pourroyent empeschier, qu'il ne commençast ainsi


Sur ce premier fueillet n'efcrirés donc aucune lettre, ou marque. Au fecōd mettez vn, d. Au troiefme, ne mettrés rien. Sur le quatiiefme, vn, e. Puis passerés trois fueillts de fuitte, fans y mettre marque. Au huiētiiefme, mettrés encores vn, d. Au neufiiefme, rien. Au dixiiefme vn, e. Puis en ayant pafsé trois, mettez derechef vn, d. fur le quatorziiefme, continuant iufqu'à la fin, cefte feconde difpofition du liure, tourné comme dict eſt. Tout cecy paracheué, baillez ce liure à quelque peintre, ou autre qui trauaille bien du crayon, pour le réplir de figures, & pourtraitz, differens les vns des autres. Comme pour exemple, vous luy ferez pluſtoſt emplir de cheualiers la lance à l'arref, ou le cotelas au poing, tous les fueillts ou, a. ſe treuuera marqué, i'entens, (le liure eſtant ouuert,) fur les deux pages, ou viſages d'i celuy, en forte que les cheualiers ſemblent courir de furie l'vn contre l'autre. Les endroitz où, b. ſera marqué, ferez peindre de ſoldatz à pied, brauement en cōche, vn ou deux de chā-

que costé du liure ouuert, comme aussi combatans entr'eux, avec harquebuses, espées, halbardes, & piques. Sur les endroitz du, c. ferez peindre des fouz, acoutrés de toutes sortes, avec leurs sonnettes, capuchons, & marottes. Et les endroits du, d. pourront estre farcis de diables, & diabolins, furies, & autres formes hideuses, tenans des fourches, tridétz, & houlfines, obseruât les diuersitez des couleurs aux crayons, selon que les choses requierent. Côme aux figures infernales, mettez le noir, y meslant aussi le rouge, pour représenter le feu la où il debura estre représenté. Du verd, & du iaulne, vous vous seruirez, pour diuersifier les foulz. Et de telles couleurs q̄ voudrez, pour les gens de guerre. Quant aux endroitz marqués, e. vous les remplirez tous de comptes, & escriptures: à fin qu'ilz soyent tous escriptz, comme si c'estoit vostre liure de raisons, ou papier iournal. Et les costés non marquez d'aucune lettre, seront laissez tous blancs. Et voila vostre liure prest. Or maintenant vous en voulant

seruir pour faire merueilles, tenant le doz d'iceluy dans la main gauche, & l'ayant tourné du costé que sont marquées les lettres, a. b. c. & tenant les doigts sur le costé d'enhaut, la où les fueillets passent, vous les fueilleterés, & ferés couler viste, & de suite, avec les doigts de la main droicte, deuant les asistans, vn peu esloignés, & ilz verront de leurs yeux vne seule sorte de figures, & pourtraitz, telz qu'aués fait peindre en cest endroit. Puis coulât les doigts plus bas, vers le milieu des fueillets, la où aussi ils passent: en fueilletant, cōme dit est, on verra d'autres, & nouueaux pourtraictz. Derechef, baissant les doigts plus bas, enuirō trois doigts, où est aussi lexture de ce costé de fueillets, en les faisant courir entre les doigts, par mesme artifice, vous ferés veoir encore d'autres figures. Après en tournant le mesme liure subtilement, & tenant les doigts en haut, on en verra d'autres. Et finalement les remüant aux autres deux endroits, & faisant cōme dit est, on verra vn liure tout escript, & apres tout, vn liure blāc

toutes ces bandes estans disparties, & évanouies, au commandement que vous leur en aures fait. Mais il vous faudra auoir bien remarqué, à quel endroit du liure, de six quil en y-a, vient la monstre de chaque sorte de figures, à fin que les leur promettant, viennent par ordre, & sans confusion, à point nommé, celles que voudrés, & le blanc touiours le dernier, comme aussi il sera fort bon d'en faire monstre au cōmencement. Celuy à qui ie veis faire cecy, lors que les diables, & furies deuoient venir à leur tour, hurtoit fort des piedz, en les appellant par quelques hurlemens retentissantz puis les monstroit. Or il faut que deuant que faire ces roigneures artificielles, le liure soit relié, & roigné vny, comme les autres, sur la trache. Au reste il y-a du temps à rendre ce liure parfait, & des frais aussi, pour le regard des pourtraitz, par ce qu'il en y aura assés bon nombre, assauoir des six parties du liure, les quatre. Mais, & le tēps, & les fraiz, ne sont à plaindre, pour iouyr du contentement que ceste inué-

tion rare, & subtile, apportera tousiours aux yeux, & a l'esprit. Voicy d'oc toutes les quatre diuersités des fueilletz couppés, comme auos dict cy dessus.



*Pour faire dancier, & tourner deux poupées,
sur vne table.*

Ayez de ces petites poupées attiffées, qu'on vend chés les marchands, & collés sous la cotte, (qui doit estre faicte en forme de vertugale,) vn petit rond de carton de liure, assés espais, prés du bas de la robe : auquel i'od aurés faict plustost six ou sept trous, de la grosseur du tuyau d'une plume, faisant passer par iceux, autant de floquetz de poil d'espolcette qu'il en faudra pour remplir ces trous, sem-

blant puis après ce rondeau, à vn costé de descrotoères, vniſſant bien, & couppant proportionnément, ce qui sort des poils, les liât biē, & renuerſant par deſſus le rond, & les entre-
laçant ferme par ce costé, les vns aux autres: & nottés qu'en poſant, & attachant ces floquetz de poil vous les deués lier aueq' vne telle diſpoſition, (en l'vne de ces poupées,) qu'ilz ſoient comme retors: mais ceux de l'autre, doiuent eſtre poſez tous droictz. Mais gardés bien, q' le bord de la cotte ne ſoit trop diſtant de la table, ou le poil trop long, à fin qu'on ne l'apperçoie lors qu'elles dâcerōt. Vo^r ceindrés auſſi l'entour du bas de la cotte, aueq' vne bēdelette de plomb, à fin, que ſi en danſant, & tournât, elles vouloyent choir, la peſanteur du plomb les en garde. Alors les ayant miſes ſur vne table, qui ne ſoit guere eſpaiſſe, hurterés des mains deſſus, aupres d'elles, ſonnant, & chantant, telle chanſon qu'il vous plaira. Et comme ſi elles entendoient le ſon, elles commenceront à danſer, l'vne allant tout droict, ou par

fois de costé, & l'autre qui à le poil tourné, en tournant en rond, devant sa compagne, comme faisant l'affetée. Par fois s'entre-rencontrants, elles feront alte, l'une deuât l'autre, sans se pouuoir quitter d'une piece. Vous asseurant que prenant peine à l'exacte dispositiõ du poil & à l'observation de ce que dit est, il y aura du plaisir nõ mediocre, & pour vous, & pour les assistans : partie desquels pensera, qu'il y ait quelque plus grand artifice, caché souz la cotte de ces damoiselles.

*Pour faire danser mignonnement des marmousets
sur la peau d'un tamis, au son
des sonnettes.*


PRenés de la moëlle du schu, & en formés, ou faites faire à vn peintre, des petits marmousets, qui n'ayēt pas plus de trois trauers de doigt de haut, les vns en forme de petites poupées, ou damoiselles : leur faisant avec vn peu de papier, comme des petites vertugales, & vn

deuant au ioly, de papier peint, sur le deuant:
les autres ferés faire, en forme de petits hom-
mes, portans vn petit bonnet, avec la plume
pédant sur l'oreille, les aucuns tenans les mains
au costé, les autres portant l'arquebuse sur le
col, & l'épée ceinte, à la soldade, accômodant
touts leurs petits membres proprement, par
pieces rapportées, & collées avec ceste moëlle,
à sçauoir la teste, les bras, le corps, & les iam-
bes: & les faictes peindre par tout, de viues
couleurs, tant pour la grace, & beauté, qu'à fin
qu'on ne cognoisse que c'est, & faut que les
piedz soyent ioincts l'un près de l'autre, sous
lesquels attacherés avecq'vn peu de cire, ou de
colle forte, la iuste moytié d'vn plôb de pisto-
le, mettant le costé plat de- contre leurs piedz,
& le rond du plom dehors, deguisant aussi le
plôb, par quelque couleur artificielle. Apres
mettés cinq ou six de ces marmoufets, ou ma-
rionnettes, pesse-messe, sur la peau d'vn tamis,
puis avec le bout d'vn petit baston, auquel deux
sonnettes soyēt attachées, tenāt le tamis d'une

main, de l'autre frapperés avec le baſton, tout doucement, contre le deſſoubs du tamis : & pour peu que frappiez, vous verrés incontinct toute ceſte petite ribaudaille, faire ſauts & gābades, au ſon des ſonnettes : & en danſant, ſe pācheront, tantost d'un coſté, & puis de l'autre, pour la rondeur du plōb, fauorable à ce brimbablement : & ſouuent dōneront du nez à terre ſe releuans auſſi toſt debout gaillardemēt, par la peſanteur du plomb, excédāt de beau coup la legereté de la moēlle, ne permettant, que ces petites ſtatuēs, puiſſent demeurer eſtendues ſans ſe releuer incontinent. Le plaifir ſera encore, ſi par bas vous liez, avecq'un peu de filet, l'homme & la femme. Car en danſant, & ſautant, aux ſecouces du baſton, ilz courberont la teſte en arriere, & auanceront le corps en auār tellement qu'il ſemblera par ce branſlement, (eſtans ainſi ioincts l'un à l'autre,) qu'ilz ſe veuillent à bon eſcient brimbaler.

Pour faire tourner une fleur de lis, d'elle meſme.

FAiçtes vne petite fleur de lys de papier, de la forme, & grâdeur que vous la voyez icy desoubs mise, & représentée marquée d'un A.



Puis prenez vne de ces paillettes noires, & retorfes, qui se tiennent à certains grains veluz de l'auoyne, avec le bout de laquelle B. attachez ceste petite fleur de lis par debas, avec vn peu de cire, faisant semblant d'auoir prins,

& recueilli par terre la premiere paillette, ou festu qu'avez treuue. Puis faictes vous apporter vne petite crouste de pain bien trépée & abreuuée d'eau. Et voulant faire tourner cecy, fichés toute la paillette par l'autre bout, dans ce pain mouillé, marqué C. & incontinent le festu se destordant à l'humidité de l'eau, fera tourner la fleur de lis lentement, deux ou trois tours. Mais il faut icy interposer l'autorité de voz commandemens.

Pour faire tourner l'aguille d'un quaudrã d'elle mesme, sans la toucher.

Prenez vne piece d'aymant, & tenant d'une main vne monstre, ou quadran d'yuoire, tout ouuert, & avec l'autre main la pierre, quatre doigtz plus bas, & par dessoubz la tablete tournés en rond avec la main, la pierre, de vifteffe moyenne: & vous verrés, que l'aguille qui est dans le quadran, se tournera d'un mouuement aussi prompt, que vostre main, tãtost

d'un costé , tantost de l'autre , selon que hastérés, ou alentirez vostre mouuement. Tant est grande la vertu secrecte de l'aymant, à attirer le fer, par vne naturelle sympathie, que mesme, elle ne peut estre empeschée, ou enuée, par la distance d'icelle, ny par l'interposition de la tablette d'yuoire.

*Pour faire tourner, & remuer vn couteau,
sans le toucher.*

PRenés vne piece de ceste mesme pierre d'aymant, iusqu'au poids de trois liures, peu ou moins : & posés vn petit couteau tout de fer sur vne table, en sorte qu'il se tienne suspendu sur la poincte d'un bout d'aguille, par le milieu sans pancher d'un costé ny d'autre, ce que les Latins appellent proprement, *in equilibrio* : & faiçtes cacher quelqu'un soubz la table, qui tienne ceste pierre entre les mains, tout contre l'endroit où le couteau est posé, & faiçtes qu'il remue la main, tantost de çà, & puis de là. Car

comm'il remuera, soit d'un ou d'autre costé, le couteau tournera de mesme, nonobstant l'interposition de la table: ce qui ne sera sans admiration.

Pour faire suture vne aiguille, tout le long d'une table, sans la toucher nullement.

C'ecy se fera encore, par la force de ceste mesme pierre, avec plus de merueille, si vous le practiqués en la façon que voicy. Prenez vn quartier de ceste pierre, qui soit assez gros: car tant plus grande vertu en à-elle tousiours. Et la tenant à la main, enuveloppée dás vn linge, (à fin qu'on ne discerne ce que vous tenez,) approchés la main d'un aiguille de fin acier, qu'aurez mise sur le bout de la table: & comme vous verrés approcher l'aiguille, retirés peu à peu la main. Car par la naturelle sympathie, qui est, comm'auons dit, entre le fer & l'aymant: se voulant l'aiguille ioindre à luy, comm'à-ce que mieux elle ayme, & desire,

elle le fuyura tousiours. Il en y-a qui ont encores voulu dire, & asseurer, (assez mal à propos, toutesfois ce me semble, & enrichissant par trop le conte,) que metant secrettement vne grosse piece d'aymant cachée derriere le blanc, auquel on vise, tirant de l'arc, que la vertu d'icelle, voulant agir sur son subiect, & attirer à soy les flèches, si elles sont ferrées d'une poincte d'acier par le bout, les ramenera tousiours dans le blanc, encores que la disposition du coup les face esquiver, & gauchir. Cardan à voulu promettre, que non seulement l'aymant attire à soy le fer: mais que l'aymant est par fois attiré par le fer, si la grosseur, & proportion du fer surpasse de beaucoup celle de l'aymant, principalement si le fer a esté touché de l'aymant, & l'aymant du fer. Ce qui semble estre à la verité croyable, par la raison qu'il en rend, fondée tousiours sur la naturelle sympathie de ces deux choses. Car l'aymant desirant le fer comme son aliment, & ne le pouvant attirer, il est attiré par le fer. Mais il faut

noter

noter, que l'aymant n'attire pas de tous costés
mais de la part où il a l'ecaille plus subtile. I'ad-
iousteray encores vne resuerie de Pline, & la-
quelle Albert le grand assure, (comme aussi
on lit infinies pareilles bourdes dans ses belles
merueilles,) & laquelle estant reiectée de Car-
dan, l'experience mesme, me l'a faicte treuver
fausse. C'est qu'estant l'aymant frotté d'ail, ou
vn diamant mis auprès de luy, il perd sa vertu
attractive. Reste encore à sçauoir, que le fer
qui-a esté frotté avec ceste pierre d'aymant,
non seulement est attiré de luy plus subtile-
ment : mais encore plus facilement il attire à
foy vn autre fer, que ne faict la pierre mesme.
Ceste pierre à encores d'autres vertus, & pro-
prietez plus admirables, que ie ne toucheray
point, ne faisans point aussi à nostre subiect,
les reseruant ailleurs.

*Pour faire cuire vn poisson, dans vne feuille de pa-
pier pleine d'huile, mise sur les
charbons ardans.*

Prenez vn petit fueillet de papier, & le pliez en quatre bordz esleués, puis l'emplissez d'huile d'oliue, & le mettés promptemēt sur des charbons ardens, sans flamme, deuant que l'huile aye penetré le papier, & cōme l'huile commencera de bouillir, mettez dedans vn petit poisson, & il cuira, & se rōtira là, peu à peu comme dans la poëlle, & le pourrés tourner, & virer a dextremēt, iusques qu'il soit cuit suffisamment: car le papier ne brullera nullemēt.


Pour faire veoir vn charbon de feu, brusler dans l'eau, & l'en tirer vif, & allumé.

Prenez vne demy coque de noix, & mettés vn charbō de feu dedās, puis posez ceste coque de noix avec le charbon, sur vn seau plain d'eau: après renuersés vn verre par dessus, & cōme vous poufferés le verre embas dans l'eau, le charbon s'enfoncera pareillement, sans que l'eau entre dans le verre, pour amortir le feu. Tellement que ce sera chose merueilleuse de

veoir reluire le feu tout vif , dans le milieu de
l'eau, & encore plus de veoir nager le charbon
tout allumé sur la superficie de l'eau , après en
auoir tout doucement tiré le verre.

*Pour enfermer deux piecettes de bois , avec deux
courroyes, en une façon , qu'on ne les pourra tirer
de là, sans rompre le bois ou l'attache.*

FAictes faire deux petites piecettes estroites,
& longues , comme les voyés cy après ,




ayāt chascune deux trous rōds, près des boutz:
 lesquels sont marqués, de ces quatre lettres,
 A. B. C. D. Puis prenés vne courroye de cuir
 dessié, d'vn palm de long, laquelle fendrés vn
 peu, près des bouts E. F. pour y faire deux fen-
 tes G. H. Et faites passer le bout F. par le trou
 A. puis le bout de la piecette A. par la fente H.
 & le bout E. par le trou C. ensemble par D.
 Et de l'autre costé, où la courroye est par des-
 sus la piecette, faires encores passer le bout E.
 par le trou C. & la piecette A. B. par la fente
 G. Puis la tirez, & sortira du trou C. demeu-
 rant empestree au trou D. en la mesme sorte
 que le bout F. est lié au trou de l'autre piecet-
 te A. Et pour tirer hors ces piecettes, vous vse-
 rez d'vn moyen tout contraire.

*Autre façon d'embrouiller deux piecettes de bois,
 avec leur attache, d'une plus grand' difficulté.*

FAites faire deux petites pieces de bois, sem-
 blables aux precedentes: mais il faut qu'en

chafcune, il y ait trois trous, leſquels vous voyes marqués de ces lettres, A. B. C. D. E. F.



Et paſſés le bout de la courroye G. par le trou A. & le bout H. par le trou B. ſi que les deux boutz ſoyét d'un coſté, puis paſſés le bout G par la fente K. & par le trou C. Après, pour en fermer l'autre piecette, paſſés de meſme ce bout G. par D. F. & puis par E. & encore par D. la où eſt le bout, tenant à l'autre piecette,

laquelle passerés par la fente I. & retirerez la courroye, de ce trou D. Parquoy ce bout sera empestre à ceste piecette, ainsi qu'est l'autre bout, à l'autre piecette: puis pour les tirer hors vous gouuernerez d'un moyen tout cōtraire.


Tablettes fort gentiles, garnies de filets differenz en couleur: de soubz ou dehors lesquels, ferez veoir une vergette, comme vous voudrez.

FAitez deux tablettes, de la forme, & grandeur que les voyez cy-après, marquées de ces nombres, 1. 2. les couurât d'un peu de parchemin, bien collé, & agencé proprement par dessus: & escriuez sur les deux costés de chaque tablette, cōme voyés, & en la forme que les y voyés mises, ces lettres A.B.C.D.E.F. Puis faictes trois petits pertuis contre un costé de chascune tablette, & deux autres sur les deux autres costez, aux endroitz que les voyés representés. Après prenés trois petits filetz de soye noire: les bouts desquel mettrés dans les

trois trous de la tablette marquée, 1. les en-
chassant proprement dedans, avec des petits
clous de bois, qui ne passent pas plus q̃ le bois
des tablettes, frottant encore avecq̃ vn peu d'an-
cre ces costés, de peur qu'on ne cognoisse en
quel endroit les boutz de ces filets sont en-
chassez: les autres trois bouts desquels mettrés
& collerés avec leurs cheuilletes, dás les trois
pertuis de la tablette marquée, 2. sur l'endroit,
ou costé que voyés, si qu'en ouurât les tablet-
tes de ce costé, ces filets noirs trauerfent le de-
dans de la tablette, 1. Puis prenés deux petitiz
filetz de soye rouge, & les collés, en la façon
que dict est, dans les deux pertuis, du doisté de
la tablette, 2. & les deux autres boutz, dans les
deux trous du costé de la tablette, 1. en sorte
que demeurant les tablettes ouuertes de ce
mesme costé, les deux filetz rouges passent à
travers le dedans de la tablette, 2. Cela ainsi a-
cheué, couppés vne petite piece de parchemin
estroit, & vn peu plus longuet que les tablet-
tes, en forme d'vne vergette, comme la voyés

à costé marquée, 3. & tenant en la main gauche les tablettes, & montrât le lopin de parchemin en l'autre, vous pourrés dire, en voulant faire ce ieu, que c'est là, vne petite touche pour apprendre à lire dans ce liuret, (monstrant le commencement de l'ABC. qui est dans les tablettes,) disant qu'il n'y-a guere de leçon, par ce que c'est pour les petits enfans, ou pour ceux qui ne font que commencer d'apprendre à lire, & qu'aux gens plus auancés, vous sçaués bien bailler plus grande leçon. Lors avec ces ioyeux motz de geule, vous mettrez ceste touche, ou vergette, le long de la tablette, & soubz les filets rouges: puis tournant subtilement les tablettes, les ouuirés de l'autre costé, (car nottés qu'elles s'ouurent de tous les deux) & on sera estonné, de veoir, qu'e les montrant ouuertes, la touche qui estoit souz les filets rouges, se treuuera desoubz les noirs: après les fermant, & derechef les tournant, & ouurât subtilemēt de l'autre costé, la vergette sera veüe soubz les filets rouges, cōme deuant.

Après posant la touche sur les deux filets noirs qui font aux costés de la tablette, 1. & par-dessous celuy du milieu, se treuuerà en tournant habilemēt de l'autre costé, estre maintenāt par-dessous les filets noirs des extremités, & par-dessus celuy du milieu de la tablette 1. & par-dessous les filets rouges de la tablette, 2: mais il ne faut icy ouurir les tablettes, qu'à demy, & incontinent les retournant, & ouurant, la vergette sera au mesme estat qu'estoit deuant.



Finally mettez la vergette sur les noirs, ou sur les rouges, comme voudrés, & tournāt habilement les tablettes, en les entr'ouurant encore ceste fois seulement à demy, (de peur

que la touche ne sorte du tout hors des filets, elle se treuuera enfermée deffoubz tous les cinq: puis encore tournât les tablettes de l'autre costé, la vergette se verra hors de tous les filets, & par dessus iceux, cōme vous l'auies mise ceste derniere fois. En vn mot, la verge qui sera maintenant d'vne façon, sera subitement d'vn'autre, & ce qui estoit tantost dehors, sera veu puis après dedans, avec estōnement des assistans: car ilz penseront que les tablettes ne s'ouurent tousiours que d'vn costé seulement.

*Pour faire passer, par vne fort grāde subtilité, le bled
d'un petit boisseau, soubz vne clochette, &
le faire disparoistre incontinent.*

FAITES faire deux clochettes de buix, de la façon qu'en voyez l'vne peinte icy bas, marquée A. & vn rondeau de gros cuir, marqué B. de la largeur requise, pour pouuoir entrer dans la bouche de la clochette. Faites faire aussi deux petites boëtes, ou boisseaux ronds, & au-


tant larges par en haut, que par embas, mar-
quées C. D. & qu'elles foyent en tout & par
tout semblables: l'une desquelles doit auoir par
dehors, comme voyez, le fondz, ou bafe tout
vny: mais l'autre doit estre vn petit creusé, de
la profondeur requise, pour renger, & enchaf-
fer dessus, l'un ioignant l'autre, plusieurs grains
de bled trié, après y auoir mis plustost vne pe-
tite couche de cole, pour y faire prendre le blé
ce qui doit estre faict si proprement, que ce
boisseau estant tourné de ce costé, semble estre
plain de blé rasclé par dessus. Ayant donq ap-
presté ces engins, lors que vous en voudrés iou-
er, il vous faut auoir mis plustost secrettemēt
du blé dans l'une des clochettes, sans l'emplir
du tout, mettant le rondeau du cuir par des-
sus, sans qu'il tienne guerre ferme: puis faut
cacher dans la poche ceste clochette, avec le
boisseau du bled colé, & les autres deux engins
tout ensemble. Quand ces Triacleurs, & Im-
posteurs font cecy, ilz portent pendue à leur
ceinture sur le deuant, vne grande gibeciere, ou

grande escarcelle , qui leur est fort fauorable,
pour cacher tels , & semblables ferremens de
leur art. Montrés donq la clochette, & le boîs-
seau vuides , à ceux qui seront presens , pour
veoir , & maniér l'un, & l'autre, tout à leur io-
ly, & petit aise, à fin (direz vous) qu'ils ne pé-
sent point puis après que ce soiét bourdes que
de vostre faict, ou que vous leur vueillés im-
poser, en leur celât voz artifices. Et lors cachés
ces instrumens avec les autres, disant que vous
leur voulés faire veoir plustôt quelques autres
petites gaillardises , pour garder ce ieu tout le
dernier, comm'il merite pour son excellence.
Ayant donq faict quelqu'autre gentillesse, ve-
nant à faire ceste-cy, tirez la clochette plaine,
gardant qu'on ne voye le rondeau qui retient
le blé, & la posez doucemēt sur la table , cou-
uerte d'un tapis: & au lieu de sortir le boisseau
simple, tirerés hors, celuy du bled attaché , le
posant, la bouche en haut, un peu loing, & à
costé de la clochette , gardant bien qu'on ne
voye l'autre bout, où gist la poison: car on treu

uera le faiçt plus admirable, quand on pensera que vous ioués tousiours avec les mesmes instrumens, qu'auies monstrés au beau commencement. Cela faiçt, faiçtes vous apporter vn'escuelle pleine de bled, & mettés dessus, le boisseau trompeur, qu'auiez posé sur la table, l'emplissant de blé en la presence de tous, & le rasclant pour faire iuste mesure, pressant encore toutesfois de la main par dessus, pour la faire meilleure: disant, que les vsuriers n'ont garde de la faire si bõne, (les malheureux qu'ils sont,) & q de telle mesure quils mesurent, il les faudroit mesurer à grands bastónades. Or cependant vous voyez bien, (car à bon entendeur, peu de parolles,) que ceste compression fourmentiere se faiçt, à fin que les grains du bled demeurans vnis, & bien rengez de ce costé là: lors qu'on verra tantost vne pareille disposition, de l'autre costé du boisseau, on le préne tousiours pour le mesme boisseau plein de bled. Après cecy, couurés l'escuelle, & le boisseau emply, avec vostre chapeau: prome-

tant de faire passer, & faire treuuer, le blé qui est dedans, soubz la clochette: laquelle leuez doucement, pour faire veoir qu'il n'y a rié deffoubz: (mais cependant vous voyez bien qu'elle à la pāce plaine,) puis la remettez doucement en son lieu. Lors leuant le chapeau avec vne main, pour faire veoir encore le boisseau plain, remettez le chapeau dessus, réuersant à mesm' instant promptement le boisseau à fin que le bled demeure dans l'escuëlle parmy l'autre: puis tenant tousiours le chapeau dessus avec vne main, emporterés avec l'autre le boisseau ainsi couuert, & le poserez sur table, assez loing de la clochette. Et ayant encore leué le chapeau, pour faire veoir l'endroit du bled collé, qui le fera iuger estre plain aux plus cler-voyās, le recouurirez derechef. Lors vsez de voz cōmandemens, renforcez de menaces, pour faire entrer, ribon, ribaine, le bled du boisseau, soubz la clochette: & incontinct descourant le boisseau, pour le faire veoir vuide, on le pensera encore estre plein, dont

vous ferez de l'esbahy, & du faché à merueilles: & ayant encore couuert le boiffeau, & leué la clochette, la poserez vn peu rudement, & comm'encolere, disant qu'il faut ce coup que le bled y entre. Lors faisant semblant d'eflongner le boiffeau, le tenāt d'vne main, & le chapeau dessus avec l'autre, le renuerferez subtilement, la bouche en haut, le laissant, ainsi couuert. Finalement ayant reïteré voz commandemens, descouurés le boiffeau, & on sera bié estonné de veoir le blé disparu: mais encore plus, ayāt leué la clochette, de le veoir deffouz,




qui estoit tombé, lors qu'à vostre rude secouss
se qu'auiez donnée, en posant tantost la clo
chette, le rondeau qui retenoit le bled, s'estoit
laissé aller, lequel sera si bien couuert par tout,
(si vous auez leué tout doucemēt la clochet
te,) qu'on ne le verra nullement. Cela faiēt, en
retirant le blé, empoignez ensemble le ron
deau, le conduisant adextremēt dans la poche
sans qu'on le voye, & le boisseau trompeur
pareillement, supposant le simple en son lieu,
à fin que vous soyiez estimé iouer avecq'vne
mesme bœte. Vous pouuez encore faire ce
ieu avec le seul boisseau trompeur, pour diuer
sifier le plaisir, en ceste sorte. Mettez le sur l'e
scuelle du bled, pour l'emplir: & l'ayāt secre
tement renuersé, à la faueur du chapeau, ainsi
qu'a esté dit, (à fin que le bled demeure dans
l'escuelle,) le poserez sur table, du costé où est
le bled collé, à fin de le représenter comme s'il
estoit plain. Puis faisant semblāt de l'eslogner
tenant le chapeau d'une main, & le boisseau
de l'autre, le renuerserez adextremēt avecq'vn
petit

petit tourdiõ, la bouch'en haut. Lors vserez cõ
me dessus, de voz commandemens, fortifiez
de quelques mots altitonants, pour faire dis-
paroistre le bled qu'on pense auoir veu dans le
boisseau: puis, après l'auoir descouuert, on le
verra vuide, aueq'vn estonnement incroiable,
ne pouuant deuiner qu'est deuenue le bled. Et
après tout cecy, ayant promptement ferré en
poche ce boisseau, supposerez, & monstrez
l'autre avec la clochette vuide, comm'auiez
faict au commencement. Vous auez cy-dessus
le pourtrait de ces engins, la où la clochette est
marquée A. le rondeau B. le boisseau du bled
attaché C. & l'autre D.

*Pour faire sembler, qu'ayez bridé quelque vn, par
l'oreille, par la iouë, ou à trauers les leures, aueq'
une corde, & la faire veoir tantost couppee, &
puis entiere.*

LEs Bâteleurs appellent cest instrument, ou
vn tel engin qu'ilz ont, vn bride-veau.

Faites donq faire deux petits bastons quarrez,
de la grandeur que voyés, & ayant faict vn
trou à chacun, près des bouts A.B. qui passent
tout outre, ferez passer vne cordelette à trauers
faisant vn nœud à chasque bout d'icelle com-
me vous voyez par la figure mise cy dessouz.




Après faites faire deux autres piecettes de bois
A.B. d'une toute pareille forme, & grandeur,
percées de mesme les autres, près des bouts C.

D. & creuses par dedans, tout du long du bois
E. F. avec deux autres trous tout outre, près
des bouts G. H. Puis faites passer la corde par
le trou C. la faisant couler dans le creux E. &
sortir par le trou G. Après la passerez par le
pertuis H. de l'autre piece B. & l'ayât fait cou-
ler le long du creux F. la ferez finalement sor-
tir par le trou D. tellement que ces deux pie-
ces estant serrées, & ioinctes ensemble, on pé-
se, en les voyant, estre les mesmes, qu'auons
monstré au commencement estre toutes sim-
ples: & faut que les trous C. D. du dehors des
piécettes A. B. passent outre, à fin qu'il y ait
pardedans deux autres trous I. K. dās lesquels
collerez vn petit tronçon de cordelette, à l'es-
gal du bois, à fin que ouurant les pieces par ce
costé, la corde qui sembloit traueser les piecet-
tes, lors qu'estant ioinctes, vous la tirerés d'vn
costé, & d'autre, semble estre couppee, passant
en cest endroit le trenchât d'vn couteau, pour
faire vostre ieu, comme dirons tantost. Et faut
que par dessus les bouts A. B. vous ayés faict

deux trous, pour enfoncer, & faire couler par là, vostre cordelette, dans les creux E.F. les fermant puis après avec deux chevilletes du mesme bois, noircissant encore avec de l'ancre, ces bouts, & tout le bois, de peur qu'on ne descouure l'artifice, & à fin que ces deux engins soyent tous semblables, & qu'on pense que vous ne vous aydez que du premier: lequel au commencement baillerez à visiter exactemēt & de près, à ceux que voudrez, tenant l'autre dans vostre poche. Puis y ayant aussi mis le premier, leur direz que s'ils veulēt gager quelque bō benefice, vous leur ferés veoir à mesme instant couppée, & reioincte ceste cordelette. Lors faisant semblant de sortir encore les mesmes piecettes simples, supposerez les autres, & les tenant ioinctes l'une contre l'autre, tirez la corde qui sort par les trous C.D. tātost par le bout L. tantost par le bout M. à fin qu'on pense qu'elle passe tout outre, & à trauers les trous C.D. & I.K. (Mais vous voyez la digression, & le chemin qu'elle va prendre par de-

dans le bois) puis ferés passer entre-deux, le trā
chant d'un couteau, ouurant les piecettes in-
cōtinēt, pour faire apparoir les boutz de corde
collés aux trous I. K. qui feront sembler la
cordelette estre couppée. Lors mettez le bout
de l'oreille de quelqu'un, entre les boutz A. B.
ou les leures, ou bien le costé de la iouë, vers
l'entrée de la bouche: tirant la corde par les
boutz L. M. & comme on le verra couler, &
fuyure, il semblera qu'elle passe, & trauerse la
chair en ces parties, & qu'elle soit reioincte mi-
raculeusement. Finalement, ostés ces piecettes
de contre la chair, & tenant les autres secrete-
ment dans la main, les supposerez habilemēt
& adextrement, á fin qu'on ne descouure que
vous ioués avec d'autres, comme en tous ces
ieus gaillardz, il faut apporter la soupplēse de
la main qu'y est sur tout requise. Il y-a biē vn
autre quasi tout pareil instrument, duquel v-
sent ces triacleurs, qu'ils nommēt bride-veau
comme nous auons dit au commencement:
mais par ce qu'ils ne iouēt que de cestuy-là

tout seul, il n'y-a pas tant de merueille, quand
il n'est permis de veoir, & manier la chose à s^{on}
aise, comm'en cestuy-cy, où nous vsons de
deux engins tous semblables, pour en pouuoir
toufiours monst^{rer} hardiment l'un, sans nulle
crainte d'estre descouuert.




*Vn autre moyen pour brider quelq' vn, avec
vn aneau, ou boucle de leton.*

FAites faire deux aneaux, ou boucles de leto
l'vne A. toute entiere, & l'autre B. qui soit
coppée, & les bouts vn peu distans l'vn de
l'autre, polis, & adoucis : & tenant B. caché
dans vostre main, monstrez A. le tenant en-
tre les doigtz de la droite. Et incōtinent, choi-
sirez parmi la trouppes, quelque bō lourdaux,
luy faisant vn peu ouurir la bouche : & lors
supposant par la dexterité de vostre main, l'a-
neau B. que tenez dans la main gauche, au lieu
d'A. qu'avez en la droicte, le mettrés prōpte-
ment, & subtilement dans le costé de sa leure,
vers la ioüe, ou mâchoire, en forte que la chair
soit empoignée dedans, & dehors, par les deux
bouts rompus de la boucle, & que s'enfonças
vn peu dedans, il semble qu'elle soit entre-lar-
dée : & encore pour mieux le faire acroire, re-
mûés souuēt, & faites couler les doigtz à l'en-
tour de la bouche, comme si vous la tourniez
la dedans, bien qu'elle ne bouge. En fin, tirez la
boucle, faisant tourner le lourdaux, le poussant
rudement contre vous, à fin qu'en luy faisant

Les subtiles

tourner le dos aux autres, par ceste secouffe, on ne voye point la rompure de la boucle, supposant à ces fins prōptement l'autre dans la même main, & la leur faisant veoir, à fin qu'õ pē q̃ tout cecy se face aue q'vne mesme boucle.



*Pour faire sembler, que passiez deux cordes,
à trauers le col.*

PRenés deux cordes esgalles en longueur, de quatre palms chascune: & les tenant par le milieu dans la main, ioinctes l'vne à l'autre, mōstrez les quatre bouts d'icelles qui pendēt: puis dictes, que les passant derriere le col, & tirant deuant vous rudement par les bouts d'icelles, vous les voulez faire passer inuisiblement, à trauers le col. Lors les tenāt par le mi-


lieu dans vofre main , comme dit eft , en les faifant branfler , & parlans toufiours pour amufer les afsiftans , les tournerez par vn tour de main fubtil , fans qu'il s'en apperçoient, les deux boutz pendans de l'une, de çà, & ceux de l'autre de là , demeurant chafcune d'icelles, repliée par ce moyen, & redoublée fur le milieu dans vofre main, l'un repli entrant dans l'autre, à fin qu'on penfe, voyant pendre toufiours les quatre bouts, que vous les teniez encore dans la main, en la mefme difpofitiõ, tout du long, comme les leur auiez monftrez au commencement. Puis les mettez ainfi accourtrées, derriere le col, preffant avec la nuque, ou chaignon d'iceluy , l'endroit où le milieu des cordes demeure doublé, à fin qu'elles n'efchappent trop aiféemēt. Lors ayāt faiēt vn nœud près des quatre bouts que tenés deuant vous, pafsés les mains à trauers ces quatre cordes, prenant avec la main droicte, les deux cordes d'enhaut, & de la gauche, celles qui regardent embas, & en tirant de toute vofre force, iet-

terez vn effroyable cry:& les cordes non seulement se treuueront hors du col miraculeusement, sans fracture, ny solution de continuité: mais encore elles en sortiront en la mesme disposition, que si les y eussiez mises toutes simples: car aussi le pensera-on.

*Comm'il semblera, que vous ayez la langue percée
tout outre, avec vn poinçon.*

FAictes faire deux poinçons de fer, l'un tout d'une venue, comm'un vray poinçon, & l'autre entre-couppé par le milieu, ayant la moytié du fer qui sort dehors, recourbé, & replié en son petit circuit, comme pouuez veoir par le pourtraict de l'un, & de l'autre, qu'en verrez cy après. Or voulant faire ceste gaillardie gentillesse, tenez caché dás la main gauche, le poinçon rompu, & montrez le vray, en le tenant avec les doigts de la main droicte. Puis faisant semblant de vous en vouloir percer la langue, prenez subtilement l'autre, les suppo-

fant habilement d'une main en l'autre, & incontinent le mettez en la bouche, tenant les dents serrées contre les cotez A. B. en sorte q toute l'exiture du fer recourbé demeure dans la bouche: & en serrant les dents, fermerés, & auancerés les leures, comme si vouliés sifler, disposant tellemēt ce poinçon, que la teste, ou gros bout d'iceluy passe, & se repose contre la leure superieure, & le bout poinctu cōtre celle d'embas. Cela faiēt, passez la langue par l'ouerture C. (qui est formée par le circuit du fer interrompu, & recourbé,) la fortāt le plus que pourrés: & elle semblera percée tout à trauers.



Finalemēt prendrés l'autre poinçon que tē-
nés en l'autre main, (& nōttés que la deués te-
nir au costé, à fin qu'on ne pensē qu'il y ait riē
dedans,) le supposant galantemēt d'une main
en l'autre, au lieu de celuy qu'auēz sorti de la
bouche: à fin que monstrāt encore en la main
droicte le poinçon entier, comm'auēz fait au
commencement, on estime que vous ayez
toufiours ioué avec celuy-là mēme.

*Qu'il semblera, qu'auēz le bras, ou le col percé, d'ou-
tr'en outre, avec vn couteau.*

FAictez faire vn couteau, qui soit rōpu, ou
diuisé, en l'endroit que verrez par la figure
mise cy après: & faut que le fer qui se tient aux
costez diuisés du couteau, soit rōd, & qu'il fas-
se vn circuit recourbé, ou exiture releuée, en la
mēme façon qu'auons dit du fer perce-lāgue
commençant ladicte diuision au costé prés du
manche, & finissant à l'autre partié du cou-
teau, sur le doz d'iceluy: tellement que mettāt

ce couteau dās le bras vers le poignet d'iceluy
ce fer replié , & recourbé , demeure enchassé
dedans, demeurāt la partie du couteau rompu
qui est vers le manche , appuyée contre le de-
hors du col du bras, & l'autre partie , contre le
dedans d'iceluy : à fin , que demeurant tout le
fer recourbé, bien caché dans la manche, join-
cte & ferrée , & les deux parties du couteau se
voyans enfoncées, & ioinctes, contre les deux
endroiets du bras, il sēble qu'il soit percé tout
outre. Ce que encore vous ferez veoir avec
plus grand' frayeur, si vous représentés vostre
main senglante, l'ayant mouillée de quelque
teinture rouge , & liquide , d'eau & de bresil.



D'autres font vn pareil couteau , pour faire
qu'on les ait dagués de frais, l'accommodant
à la gorge, puis se tenans tous roides estendus

par terre, en cest equipage, les yeux tournez dans la teste, & le col teint comme s'il estoit ensanglanté: car ie ne sache celuy, qui ne feust saisi d'une terreur incroyable, si entrant dans vne chambre, il rencontroit inopinément vn tel spectacle, pour si assésuré qu'il feust, & qui ne fendist l'ergot bien vitemment, de peur d'estre atteint, & cōuaincu de meurtre, estât treuvé *in crimine flagranti*.

*Pour faire sembler, qu'ayez percé le front à quelq'vn
& que faciez sortir par là, mettant vn petit entonnoir de contre, le vin qu'il aura beu plus tost.*


FAites faire deux petits entonnoirs de fucille de fer blanc, & les faiçtes foudrer l'vn dās l'autre, tout à l'étour de la bouche, & ausi par le bas, en forte toutesfois, qu'il n'y ait qu'vn canon, ou tuyau, seruāt pour tous deux, & que regardant dedans, & à trauers le tuyau, on iuge que c'est vn seul entonnoir, tel que vous le verés cy-aprés marqué A. & faut en les soudāt,

qu'on laisse entre-deux vn peu de vuide, & vn petit bord, ou repli par dehaut, tout à l'entour de la soudure: sur lequel ferés faire vn petit pertuis rond, B. & embas, contre le milieu du dedás du tuyau D. où le fer est encore double, vn autre petit trou, lequel nous auons marqué en deux lieux C. (bien que ce ne soit qu'vn seul trou,) non seulement pour représenter à l'optique, l'endroit où il doit estre mis par dedans, près du tuyau D. comm'auons dit: mais aussi sur la bouche, ou entrée large de l'entonnoir, pour monstrier seulement à l'œil, que regardant par la bouche, iusques dans le tuyau D. on peut veoir à costé d'iceluy, le pertuis C. Pour faire donc ce passetemps, vous deuez plustost auoir rempli de vin cest entonnoir, en mettant le doigt deuant le trou D. à fin que le vin ne puisse tomber par là, & qu'estant peu à peu, & non tout à coup versé dans l'entonnoir il s'enferme aussi, & entonne petit à petit, dás le vuide qui est entre-deux, entrant par le pertuis C. & montant tousiours, iusqu'à ce que

tout le vuide soit plain , ce que cognoistrez,
en voyant reluire le vin sur l'entrée du pertuis
B. lors l'ayant fermé aueq' vn peu de cire, oste-
rez le doigt de deuant le trou D. à fin que le
reste du vin qui estoit demeuré dans la bou-
che de l'entonnoir, se verse, demeurant le vui-
de d'iceluy tout rempli: ce que vous aurés faict
plustost secretement. Lors voulât faire veoir
ceste plaisante merueille , monstrerés vn peu
de loing cest engin vuide, comm'il sembl'e-
stre: puis l'ayant rempli de vin , en la presence
de tous , tenant le doigt deuant le trou D. de
peur qu'il ne verse , faites le boire à quelque
garçon. Après feignés de luy percer le front,
auec la pointe d'vn couteau , ou pour mieux
faire, auec vn de ces poinçons industrieus emēt
faictz, d'vne façon, qu'ilz se perdent, & enfon-
cent tous dans le manche, comme si le fer en-
troit tout dans la chair, & tout à l'entour, font
sortir comme du sang , & dont nous en met-
rons la figure , à nostre seconde & plus ample
edition. Cela faict, mettez le doigt cōtre l'en-
droit

droit que vous auez fait semblant de percer,
& incontinent ayant égratigné, & osté ce peu
de cire qui fermoit le trou B. mettés la bou-
che de l'entonnoir contre son front, le trou B.
en haut. Car à mesure que laisserés vn peu en-
tr'ouuert ce trou, sans presser trop l'entonnoir
contre le front, vers cest endroit, sinon seule-
ment par le costé d'embas, le vin sortira par le
trou du tuyau D. Et chaque fois pressant tout
l'entonnoir contre le front, le vin s'arrestera,
puis encore quand laisserés respirer le trou B.
en soufleurant vn peu ce costé d'entōnoir, sans
qu'on s'en puisse apperceuoir, le vin encore tō-
bera. Mais à mesure que voudrez faire à poses
sortir le vin, faites tousir le compaignon, à fin
qu'en s'esforçant ainsi, tout le vin qu'il à beu,
puisse mieux (direz vous) sortir du front, ius-
qu'à la derniere goutte. Ce qui sera veritable,
pour le regard de celuy qui estoit arresté dans
le creus de nostre entonnoir artificiel. Et voila
comment la simplicité des ignorās est deceüe:
faisans encore acroire, ces habladours, avec ce

Les subtiles
mesme instrument, qu'ils tirent du vin, d'une
porte, ou d'une muraille.



Comme vous pourrez sçavoir le nombre,
qu'on aura pensé.

DICTES à quelq'un, qu'il pense tel nombre
qu'il voudra, puis faites comm'est porté

par cest exemple. Prenés le cas qu'il aye pensé
5. faites luy adiouster à ce nōbre, la iuste moy-
tié d'iceluy, qui sont deux & demy, lesquels,
estant adioustez à 5. rendent 7. & demy: & faue
qu'il face ceste addition tout bas, à-part soy: &
demandez luy, s'il tient aucun demy, c'est à
dire, si le nombre total ainsi assemblé, est par-
faict, ou imparfaict: & s'il n'est parfaict, & en-
tier, dictes luy qu'il l'en face: comm'icy, 7. &
demy rendront 8. en adioustant vn autre de-
my: & voila la premiere partie de ce ieu. Puis
pour la secōde fois, faictes luy encore adiou-
ster à tout ce nombre de 8. la iuste moytié d'i-
celuy, à sçauoir 4. qui feront 12. Et demandez
luy, si à ceste seconde fois il y-a aucun demy,
& si ainsi est, qu'il le face rond & entier: mais
comme vous voyés, il n'en y-a point icy, car
12. est vn nōbre parfaict: & nottez, que le pre-
mier demy qui se treuuera, prouenant de la
premiere partie de ce ieu, doit estre par vous
secretement retenu, pour 1. & le second, (s'il
s'en treuve encore vn'autre, en la seconde par-

tie, ou computation de ce ieu,) fera par vous
 compté pour 2. la valeur desquels estant assem-
 blée, rendroit 3. Or ce que dessus ayât esté fait
 vous luy demanderés combien de fois 9. se
 peuuent bien retrouver en son nombre entier
 & total, deux fois adiousté, comme dit est: car
 autant de fois 4. vous faut secrettement rete-
 nir à part vous, lesquels adioustés au nombre
 qui sera prouenu des demis, ou demy qui se
 fera rencontré, fera en tout, le nombre lequel
 il auoit premierement songé. Que s'il ne s'y
 trouue aucun 9. le nombre seul, prouenu du
 demy, ou des demys, sera sans doute celuy qui
 à esté pensé. Or icy en ce nombre total de 12.
 se trouue vne seule fois 9. sans plus, (comme
 voyez,) qui vaut 4. lesquels adioustez à 1. de-
 scendu du premier demy, nous rend le nōbre
 de 5. qui estoit celuy qui premierement auoit
 esté pensé: & ainsi ferés de tous autres. Mais en-
 core cecy se pratiquera beaucoup plus facile-
 ment, & avec moins de peine, par cest autre
 moyen que voicy.

*Antre moyen plus facile, & court, pour treuuer
vn nombre pensé.*

A Pres qu'il aura pensé tel nombre qu'il voudra, dites luy qu'il y adiousté deux fois autant, puis qu'il en reiette autant de fois 6. qu'il en y treuuera: & n'en pouuant plus oster, que de ce qu'il tient de reste, ne pouuant faire 6. il en oste 3. s'ils y font. Or nottez, qu'autant de 6. qu'il aura dit se treuuer en son nombre trois fois multiplié, comme dit est, autant de fois 2. vous faut secrettement retenir: & cōpter tousiours pour 1. le 3. qui se treuuera prouenu, de ce qui ne pouuoit faire 6. & adioustant le tout ensemble, ce sera le nombre imaginé. Et si les 6. ostez, il n'y demeure rien plus, ou que ce qui reste ne puisse faire 3. en ce cas, ce qui prouendra des 6. qui s'y trouueront, sera le nombre qu'il auoit pensé. Mais si après qu'il aura trois fois doublé son nombre, il ne s'en peut oster aucun 6. (comme pouuez iuger, au cas qu'il eust pensé 1.) lors vous faudroit compter, &

retenir 1. pour le seul 3. qui se treuve à oster, qui
feroit, comme voyez, le mesme nombre. Et
si ayant trois fois doublé son nombre, il ne s'y
trouuoit qu'un 6. à oster, sans aucun 3. de reste
vous prendrez le 2. prouenant du 6. car ce sera
le point pensé. Vous en auez icy vn exemple.
Ayant songé 5. & iceluy deux fois multiplié,
seront 15. puis en ayant osté deux 6. les conte-
rez à-part vous pour 4. & luy ayant encore
fait oster le 3. qui s'y treuve de reste, ne pouuât
faire 6. le compterés pour 1. Or 4. & 1. adiou-
stez ensemble, vous rendent 5. qui est, comme
pouuez veoir, le nombre pensé en nostre ex-
ple : & ainsi vous gouuernerez en tous autres.

*Pour sçauoir dire en vne compaignie, auquel de tous
aura esté baillé vn aneau, en quel doigt il l'aura
& en quelle ioincture.*

FAictes asseoir les personnes par ordre, selon
le nombre qu'elles feront, leur monstrent
quel de tous vous voulez estre le premier, quel

second, quel troisieme, & ainsi des autres. Pareillement que les doigts de chascun d'eux soit ragné par ordre, iusqu'au nombre de dix, en leur monstrant, quel vous voulez estre le premier, quel le second, & ainsi des autres: commençant depuis le pouce de la main droite, & finissant à l'anelier de la gauche. Puis vous étant tiré à part, ditez à quelqu'un de la troupe, lequel vous aurez choisi propre pour compter de la plume, qu'en se tenant debout, sans estre compris au rang des autres, il double avecq'une plume, sur un peu de papier, le nombre de la personne qui a eu l'anneau, auquel nombre faites luy adiouster 5. puis encore multiplier ceste somme par 5. à laquelle multiplication luy ferez adiouster le nombre du doigt où est l'anneau, par-dessous, & vis à vis de la premiere figure du nombre total: & deuant iceluy, faites luy mettre à l'escart, le nombre de la ioincture, en sorte qu'il occupe le premier rang, ou ordre du nombre: comme qui mettroit 2. deuant 7. il auroit 72. Après venez, & luy de-

mandez tout le nombre qu'il tient, duquel osterez secrettemēt à-part vous, avec la plume 250. & le restant vous certifiera fort ingenieusement, & comm'vn vray oracle, de ce que desirez sçauoir. Car sçachez que les centaines representent la personne qui a l'aneau, les dixaines, les doigts, & la premiere figure demōstre, par le nombre des vnités, en quelle ioincture il est: selon que cecy sera rendu cler, & familier, par l'exemple suyuant. Prenons le cas que l'aneau aye esté baillé à Iean, qui soit assis le sixiesme en ordre, qu'il l'aye au doigt enseigneur de la main gauche, (qui est le septiesme suyuant la precedente disposition de tous les doigts,) & que ce soit en la troisieme ioincture d'embas. Vous tenāt donq loing, dites a celui qui conduit l'action, qu'il mette à part cecy, sur vn peu de papier, par forme de memoire, en ceste sorte que voyez icy:

6. personne. 7. doigt. 3. ioincture.

puis faictes luy doubler, comm'auons dit, le nombre de la personne qui a l'aneau, & y ad-

iouster 5. puis multiplier tuot cela par 5. Après
 faiçtes luy mettre dessoubz , le nombre de la
 ioincture, & celuy du doigt aussi, en la propre
 disposition qu'auons dict, & comme voyez
 icy mis le tout, par ordre, & de suite:

$$12.$$

$$5.$$

$$17.$$

$$5.$$

$$85.$$

$$73.$$

puis après, dictes luy, qu'il adioust par addi-
 tion tout ce nombre, tant celuy de 85. que ce-
 luy du doigt, & de la ioincture, qu'est dessouz,
 en la façon que voyez icy.

$$85.$$

$$73.$$

$$923.$$

Cela faiçt, vous ayant faiçt bailler le nombre

total qui en sera prouenu, qui est, ainsi que voyés, 923. vous en osterés par subtraction 250. pour sçauoir ce qui restera, qui est, comme pouuez veoir, 673. en ceste sorte.

923.

250.

673.

Si donq au nombre restant les centaines representent la personne qui a l'aneau, les dixaines le doigt, & les vnitez de la premiere figure du nombre, la ioincture, comme auons dit au cōmēcemēt, puis qu'en ce nōbre de 673. il y-a premierement six cens, sept dixaines, & trois vnités, il faut dire, & cōclurre de necessité, que la sixiesme personne à l'aneau, au septiesme doigt, & en la troisieme ioincture. Ce q vous direz puis après, (à fin que cecy aye plus de grace,) en montrant la personne, & cōsignāt la main, le doigt, & la ioincture, sur vōtre main mesme. Mais s'il aduiēnt, toutes additions, supputations, multiplications, & subtractionis

estant faictes, & qu'au lieu de dixaines, se trou-
uaist 0. Alors il faudroit oster vne centaine de
la figure prochaine de deuât, & la conter pour
dix dixaines, au lieu de 0, en disant que l'aneau
seroit au dixiesme doigt. Comme pour exem-
ple, si toutes les snpputations faictes, il se trou-
uoit ce nombre de 951. vous voyés, qu'ayant
soustrait d'iceluy 250. il resteroit 701. Ce qui
denoteroit, que la sixiesme personne auroit l'a-
neau, au dixiesme doigt, & en la premiere ioin-
cture d'iceluy.

*Pour sçauoir dire les poinctz que quelqu'un aura
faictz, avec trois dés.*

Prenez trois dés, & dictes à quelqu'un, qu'il
les iecte sur table sans que le voyés, & qu'il
cōpte, & assemble en vn blot, tous les poinctz
qui se rencontreront dessus. Puis en ayant leué
deux, qu'il adioust les poincts de dessoubz,
aux autres de dessus tous les trois qu'il auoit
desia retenuz, & que de rechef il roule sur ta-

ble les deux qu'il tient, adioustant à tout le reste, les poinçts qui se rencōtreroūt dessus. Lors vous estant approché, pour deuiner tous les poinçts qu'il aura ainsi faits en vostre absence, auisez sans faire semblant de rien, combien de poinçts vous treuuez en tout, par dessus les trois dés, qui ont esté laissez, (car ayant faict tout ce que dit est, il luy faut dire, qu'il laisse ainsi les dés sans les toucher :) & adioustés à iceux 14. poinçts. Car sans nul doubte, ce sera le nombre entier de tous les poinçts qu'il auoit faictz, & retenuz en vostre absence. Mais à fin qu'on ne comprenne cest artifice, (ayant d'un coup d'œil conté, & retenu à vostre arriuee, comme auons dict, tous les poinçts que verrez dessus,) iettez tous les trois dés sur table, assemblant à part-vous, (en les brouillant dans la main,) & adioustant à iceux les 14. qu'auons dit, regardant attentiuement ce qui viendra dessus, à fin qu'on pense que vous vous seruez de ceste derniere monstre des dés, pour deuiner, & non de la premiere que treuuez à vo-

tré arriüée , bien que ce soit seulement pour faire la mine: car desia vous sçauiez vostre cõpte, & n'y faillirez iamais.

Pour deuiner trois choses differentes, que trois personnes auront prinſes, & cachées.

Disposez trois personnes en tel ordre , que l'vn soit premier, l'autre secõd, l'autre troiesme , retenant cest ordre à-part vous , sans qu'on cognoisse que le gardiez. Puis rangez aussi en pareil ordre sur table, trois choses differentes l'vne de l'autre, retenãt aussi en l'esprit quelle des trois voulés estre la premiere, quelle seconde, & quelle troiesme , sans qu'on cognoisse que reteniez en vostre esprit aucun ordre d'icelles, comme prenez le cas que ce soyët vne clef, vne bague, & vn fou. Aprés mettez 24. getz sur table, desquels en baillerez vn à celui qu'auetz retenu pour le premier, au second en baillerés deux , & au troiesme trois : puis laissez sur table le reste des gets, & ales vous-en

vn peu loing, leur disant, qu'en vostre absence
ils prennēt, & cachent chacū, telle chose qu'il
leur plaira. Puis criez tout haut, que celuy qui
a prins la clef, prenne dans sa main, autant de
gets que luy auiez baillé: celuy qui a prins la
bague, deux fois autant, outre ce que luy auiez
baillé: & que celuy du sou, en prenne quatre
fois autāt, sans compter ce que leur auies bail-
lé: prenans ces gets, des 18. qu'auies laissé sur ta-
ble, sur laquelle aussi leur dirés qu'ils laissent les
gets qui demeureront de reste, après auoir fait
tout ce dessus. Car s'il n'en y-a qu'vn seul, la
personne que vous aués retenue la premiere
en rang, aura prins & caché la premiere chose,
qui est la cléf, la secōde personne aura prins la
seconde chose, qui est la bague, & la troisieme
personne aura prins le sou, qui est la troisieme
chose par vous retenue. Et ainsi vous gouuer-
nerés pour le regard des autres getz qui reste-
ront, selon que vous voyés cecy marqué dās
la figure d'apres, par laquelle vous voyés, que
le plus grand nombre qui peut rester, se sont 7.

& que iamais n'en peuuent reſter 4. quelque choſe qu'ils prennent, en changeant tât qu'ils voudront, au prendre. Vous pourrés porter ſecrettement la figure ſuyuante, imprimée dans la paulme de voſtre main : à fin que regardant d'un clin d'œil en icelle, ſans qu'on s'en aduiſe: (ce que vous ferez, ſi vous tenez les doigtz contre le front, côm'en faiſant du ſonge-creuſ ſur ce qu'auéz à reſpōdre,) cecy vous ſoit aiſé, l'ayant deuant les yeux, par ceſte gaillarde inuention. Et faut touſiours, pour conſeruer la grace de ce ieu, nōmer en deuinant, & les perſonnes, & les choſes, par leur nom

Reſte de getz.

1	1	2	3
2	2	1	3
3	1	3	2
5	2	3	1
6	3	1	2
7	3	2	1

choſes
cachées.

*Comme vous sçaures dire, le nōbre des gets que trois
personnes auront dans leurs mains.*

VOus disposerez encore à part-vous trois personnes, en pareil ordre que dit est: & posez sur table trois monceaux de gets, au premier desquels en ait 1. au secōd 2. au troisiēme 4. qui font 7. & laissez sur table les 2 3. qui serōt de reste: (car nottez qu'à faire se ieu, il en y faut en tout 30.) Après dites leur, que chascun prenne le quel il voudra de ces trois rangs de gets: mais que celui qui sera le premier à prendre prenne de ceux qui restent sur table, autāt qu'il en y auoit au monceau qu'il auoit prins: celui qui sera le second à prendre, qu'il en prenne deux fois autāt, & celui qui prendra en troisiēme lieu, quatre fois autāt, laissant le reste sur table: & faut qu'ilz fassent tout cecy en vostre absence, puis qu'ils vous r'appellent. Lors gouuernez vous à deuiner, en ceste sorte, par le nombre des getz que treuuez de reste sur la table. Car s'il s'en treuuent 6. celui qu'auiez retenu

rettenu premier, n'aura que 2. getz d'as fa main
le fecond 6. le tiers 16. iugeant ainfi du furplus
par la figure fuyuâte, felon le refte des getz: &
notez que iamais ne peuuent refter moins de
6. getz, ni pareillemēt plus de 12. encore qu'on
change tant qu'on voudra, en prenant, & ia-
mais n'en peuuent refter 9.

Restes des getz:

6	2	6	16
7	4	3	16
8	2	12	8
10	4	12	4
11	8	3	8
12	8	6	4

getz treuvez
dans la main

Pour ſçauoir dire combien de getz, ou pieces d'argent
quelqu'un aura dans ſes mains.

Dites luy qu'il mette autant de pieces en
l'une main, comme en l'autre, à ſa diſcre-

M

tion : puis dites luy qu'il en mette de la main droite, dans la gauche, 5. ou 6. ou 7. comm'il voudra, pourueu aumoins qu'ils y foyent. Après luy en ferés mettre, de la gauche dans la droite, autant qu'il y en auoit laissé: & s'il n'y auoit rien laissé, il ne faudroit par consequent qu'il y mit rien. Cela faict, sans nul doubte, il se treuuera dans la main gauche, vn'autre fois autant de pieces, comm'au commencement vous luy en auiez faict mettre, de la droite, dans la gauche. Pour exemple de cecy: presupposons qu'il en eut plustost caché 8. à chasque main, & qu'il en eut mis après, de la droite, dans la gauche, 3. & de rechef, de la main gauche, en la droite, autant qu'il y en auoit laissé à sçauoir 5. vous voyés qu'il faut, que dans la gauche il y en ait 6. qui font deux fois 3. ce q'lors vous luy dirés: faisant ainsi de tous autres.

Pour faire, qu'ayant posé 20. getz en rond de deux en deux, & comptant de cinq en cinq, puis en leuant vn, vous osterez tous les 10. de dessus.

R Angés 10.getz. en rond sur vne table,& en mettés autres 10.par dessus. Puis commēcés de compter sur celuy que voudrés, s'uyuāt avec le doigt : & leués le cinquiesme get de dessus. Après recommencés à compter vn, sur le get qui est demeuré seul, ostant de mesme, le cinquiesme, en comptant ainsi tousiours de cinq, en cinq, & recommençant à compter vn sur le get qui sera demeuré seul. Mais notez, que lors que vous en aurez cinq de leuez en vostre main, il vous en faut sauter habilement vn, en recommençant de compter sur le sixiesme d'après, tenant ce coup là, le doigt en l'air sans toucher les getz, de peur qu'on ne cognoisse que vous cōmenciés ceste fois à compter vn, sur le sixiesme get, & que la fourbe ne soit descouuerte: mais deuant, & après le cinquiesme get leué, il les faut monstrier du bout du doigt, en les s'uyuant, & tournoyant, à fin qu'on pense, que vous recōmencés tousiours sur chasque simple get. Et en ceste sorte ostés tous les 10. getz de dessus, laissant les autres

10. simples, & descouuerts. Le plaisir de ce ieu gist, en ce qu'on se rira de la facilité d'iceluy pensant incontinent en faire tout autant que vous : mais à l'experiance, on se treuuera bien camuz. Toutesfois ne faiçtes ce traiçt plus de deux fois, & pour cause.


*Pour sçauoir dire, lequel de 16. ieçts
on aura touché.*

Disposez 16. getz en deux colônes, 8. de chaque costé, comme voyez en la premiere figure marquée A. B. des deux mises cy après. Puis dictes à celuy que voudrés, qu'il touche, & remarque bien, tel get qu'il luy plaira : puis qu'il vous die en quel rang, ou colomne il est. Et s'il respond du costé A. vous voyés, que ce doit estre l'un des 8. de ce mesme costé. Lors prenez avec le bout du doigt enseigneur de la main droicte, le get penultiesme de ceste colonne A. & avec celuy de la main gauche, le dernier get de la mesme colomne, & posés ces

deux getz, l'un deçà, l'autre delà, aux costés de la colonne B. vers le haut. Puis prenés de la main droicte le get cinquiesme, & de la gauche le get sixiesme de la colonne A. & les posez souz les autres deux, l'un deçà, au mesme costé de son compaignon, & l'autre delà, aussi du costé de son compaignon. Puis faictes-en autant du troisieme, & quatrieme, & du premier, & second, demeurant la colonne B. au milieu de la colonne A. reduicte par ce moyen, comme voyés, en deux parties, 4. de chacune. Après, à ces deux petis rangs nouveaux, de 4. chascun, adiousterez les getz de la colonne B. les posant deux à deux, l'un deçà, l'autre delà, deffouz les autres, à fin que les 16. getz aient la mesme forme en leur dispositiō qu'ils auoyent au commencement. Cela faict dictes luy qu'il vous die ceste seconde fois, en quelle de ces deux colonnes nouvelles est maintenant le get qu'il auoit touché. Car vous voyés & pouués iuger, que de necessité il faut qu'il soit l'un des 4. d'en haut, de l'une, ou de l'autre

colône. Or posez le cas que le get soit maintenant au costé droit des 16. getz. Puis que, cō m'auōs dit, c'est necessairemēt l'vn des 4. d'en haut, il faut donq faire vne seconde dispositiō & remuēment, de ces 16. getz, en la mesme sorte qu'auons dit au commencement, prenant de la main droicte, le get penultiesme, & de la gauche le dernier, les posant aux costés de l'autre colomne, l'vn deçà, l'autre de là, en sorte qu'elle soit au milieu. Puis en faire autant du 5. & 6. du 3. & 4. du premier & second: & encore adiouter à ces 8. (disposez 4. de chasque costé,) les 8. du milieu, souz les autres, en mettant aussi 4. de çà, & 4. de là: à fin que tous ces 16. getz, reuiennent en la mesme disposition, 8. de chasque costé, qu'ilz estoient au commencement, ez deux colomnes A. B. auisant bien de l'œil, où iront les 4. getz, à l'vn desquels estoit de necessité, celuy qu'on auoit touché: car maintenant vous voyés, qu'il faut de mesme necessité, qu'après auoir demādé, de quel costé il est, ce soit l'vn des deux, de l'yn costé,


ou de l'autre, là où les 4. auoient esté despartis.
 En fin, pour ſçauoir lequel c'eſt de ces deux,
 en diminuant touſiours, comme voyés, ferés
 vn troiſieſme, & tout pareil remuément, adui-
 fant bien, où iront les 2. getz qui ſont d'un co-
 ſté, l'un deſquels, ſoit en haut, ou embas de la
 colonne, fera voſtre get. Or ceſte derniere
 fois, l'un de ces deux allant de çà, l'autre de là,
 & vous faiſant monſtrer la colonne où eſt le
 get, vous ne pouuez faillir de le deuiner, com-
 me vous pouués iuger facilement, ſi vous auez
 bien noté la façon de proceder.



Pour passer vn couteau à trauers vn fil, par où serōt
 enfilez trois patenôtres, sans qu'il se treuue
 couppé, estans les patenôtres
 tombez à terre.

Prenez deux filetz, lesquels plierés en dou-
 ble comme voyez cy après, & les adiou-
 ftez proprement, aueq' vn peu de fil. Sur ces fi-
 lets ainsi acoutrés, passerés trois petis patenó-
 tres que noterons de ces trois lettres: A. B. C.
 mais ie ne mets pas de rang celuy du millieu,
 à fin que puissiés mieux comprendre, cōment
 le filet est accommodé. Cela fait, tenuersez le
 bout D. vers E. pour les ioindre ensemble, &
 le bout F. vers G. ayant fait plustost vn demy
 noeud sur les patenôtres, ou globes, avec ces
 filetz. Puis les baillés à tenir par les bouts D.
 E. & par F. G. avec les deux mains. Alors pas-
 sez vn couteau entre B. C. & le petit lopin qui
 tient les filetz liés en double, estant couppé,
 les patenôtres tomberont en terre, demeurant
 les filets entre ses mains, tous entiers. Mais

il faut, pour rendre ceste subtilité plus admirable, qu'ayez appresté deux autres filetz, ou cordelettes, dans lesquelles aurés enfilé trois pate nôtres tous semblables, & ayant faict vn simple nœud sur iceux, avec les deux bouts de l'vn des filets, & les faisant tenir par les bouts, promettez de couper ces filetz, & les petits globes estant tombés à terre, les faire voir entiers: mais que vous ne le pouués faire, sans quelque honneste gaieure. Puis faisant semblant de cōtester sur icelle, conduirés finement ces filets, supposant adextrement les autres, faisant cōm'auons dit: & faut que les globes entrent assés pressés, dans les filets, ou cordelettes.



Pour faire, qu'ayant mis vne sonnette à chasque main, elles se treuueront toutes deux en l'vne.

C Achés premierement vne sonnette, dans l'entrée de vostre manche, puis posez sur

table deux autres sonnettes , & prenant l'une, avec les doigts de la main droite, la mettrés dans la main gauche, prenant l'autre, en l'autre main : & tenant les mains serrées , faictes sonner ces sonnettes là dedans, branlant tantost l'une main, tantost l'autre, pour monstrier qu'elles sont dedans. Après les poserés sur table, l'une après l'autre : puis les ayant meslées, & brouillées avec la main, comm'on brouille les dés, les remettres une en chascque main comme dessus, les remettant encore sur table devant tous. Lors faictes vostre traict de subtilité en ceste sorte. Ayant brouillé derechef les sonnettes, prenés-en l'une, entre les doigts de la main droite, & faisant semblant de la mettre dans la main gauche, froterés la sonnette contre la paume de la main droite, come de passade, ferrant incontinent la main gauche, & faisant sonner la sonnette de la manche, à fin qu'on la pèse estre dans ceste main : mais cependant il faut à mesme instant la retenir cachée entre le petit doigt de la main droite:

avec laquelle prendrés l'autre sonnette:& tenant les deux mains fermées, ferés sonner la sonnette qui est en la main droicte, puis à son tour, celle qui est en la manche de l'autre main. Et n'y aura celuy qui ne pense, que chaque main aye sa sonnette: principalement, si vous aués apporté en cecy la souppléssé, & dexterité requise. Finalement, ayant faict souffler sur la main gauche à qu'elq'vn, ouurez la, leur monstrant qu'il n'y à rien dedans, puis après ouurés l'autre, & on sera bien esbahy de veoir toutes les deux sonnettes dans icelle.

*Pour couper vne pomme en plusieurs pieces,
sans que la peau se treuue, nul-
lement entamée.*

PRenés vne aiguille à coudre, la plus longue & deliée, que pourrés choisir, & l'enfilés avecq'vn fil de foye, puis la cousés adextrement entre la peau, & la chair, commençant au bout de la queue, & finissant, (en tournoyant, de pi-

queure en piqueure,) au mesme endroit qu'a-
uez commencé:& faut à chaque point, remet-
tre l'aguille, par le trou d'où elle sera sortie.
Puis en tenant vn bout de la soye, appuyé fer-
me contre la pomme, tirez par l'autre bout,&
il couppera à trauers la pomme en deux pie-
ces, par dedás. De l'autre costé, ferés le mesme,
fichant l'aguille per égales distances, en cou-
fant tout à l'entour: puis tirant la soye par les
bouts, la pomme sera couppée par dedans, en
quatre pieces. Et si encore vous en voulés fai-
re huiët, repassez l'aguille à trauers, & tout à
l'entour de la pōme, en la mesme sorte qu'a-
uons monstré. Cela faiët, seruez de ces pom-
mes en table: & celuy qui en prendra vne à
peler à fin de la donner, pour faire l'honneste,
sera tout esbahy de la veoir tomber en huiët
pieces, entre ses mains, demeurant toutesfois
la peau, toute entiere. Laquelle inuention sera
treuuée, des inuités, non moins subtile, qu'ad-
mirable: cōme de ma part, ie la treuuy telle,
la premiere fois que ie la vis pratiquer.

Pour faire, que mettât en deux mouchoirs, deux pié-
ces d'argent, en chascun la sienne, (comm'il
semblera,) toutes deux seront treu-
nées en l'vn d'iceux.

PRennés trois pieces d'argët toutes sembla-
bles, & en cousez l'vne en vn mouchoir: le-
quel prendrez, cachant l'endroit où la piece est
coufue. Puis posez l'vne des autres deux pieces
sur table, au milieu du mouchoir estêdu sur i-
celle, faisant pendre prés de vous, plus bas que
le bord de la table, le bout de la piece coufue.
Lors posant vostre seconde piece sur le milieu
du mouchoir, prenés le bout pendât d'iceluy,
auquel la premiere piece est cachée: & faisant
semblant de couvrir ceste piece avec les deux
bouts du mouchoir, la cacherés subtilement
entre le petit doigt, laissant au milieu du mou-
choir, la premiere piece coufue, à fin qu'en la
baillant à taster, ainsi couuerte, on pense que ce
soit celle que tenez cachée en vostre main: &
baillez à tenir ce mouchoir ainsi enuveloppé, à

quelqu'un. Lors prenez l'autre piece, des deux qu'auiez posées sur la table, avec la mesme main qui en tient vne de cachée, les mettant toutes deux, dās vn autre mouchoir, sans qu'ō s'aduise que teniēs à la main, sinō la dernière: & baillez ce mouchoir à tenir, ainsi enuelpé, à quelqu'autre. Lors tirez le premier mouchoir par vn bout, hors des mains de celui qui le tient, & le secoüés sur l'autre mouchoir, faisant semblant, de murmurer quelques charmes. Finalement faictes secoüer ce mouchoir sur la table, à celui qui le tient: & on sera fort estonné d'en veoir sortir, & tomber toutes les deux pieces, croyant qu'en eussiez mis vne en chascun mouchoir, & que par quelque superlatiue magie, & traict d'inuisibilité, vous les ayez faict treuuer toutes deux, en l'un d'iceux.

*Pour faire sortir tous les pois hors
d'un pot.*

PREnez du mercure, ou argent-vif, & le mettez secretelement dans le pot, auquel on fait

cuire les pois, & vous verrés vn beau remue-
ment de mesnage: car le mercure les chassera
hors du pot, si bien qu'il n'en y demeurera pas
vn seul dedans.

*Comment vous ferez rôtir, & tourner vn oiseau à
la broche, de luy mesme.*

PREnez vne petite verge de ce bois dont on
fait les lardoires, vulgairement appellé, Sâ-
guin, & l'ayant pelée, & nettoyée, fichez au
milieu d'icelle, ce petit oiseau, qu'on appelle le
Roytelet, après l'auoir plumé. Puis mettés ce-
ste petite broche ainsi garnie, deuant le feu,
appuyée, par les deux bouts, sur deux fourche-
tes de bois, la mettant en train de tourner: car
elle ne cessera puis après, iusqu'à ce que l'oiseau
soit cuit. Ce qui sera treuue, (comm'il l'est aus-
si à la verité,) vn cas esmerueillable, & comme
prodigieux en nature.

F I N.

Corrigez ainsi les fautes, escheües en ceste premiere
edition: là où f. denote le fueillet, a. la page
premiere, b. la seconde, &
l. la ligne.

Feuillet 10. a. ligne 13. sur, lisez soubz. b. corrigez aussi la figure de la main, en l'endroit de l'anelier, iusqu'à la ligne menfale, à fin que la figure responde, au discours du secret. f. 17. a. l. 21. demeurent, li. demeure. l. 22. les, lisez, le f. 13. a. l. 5. & l. 11. Et b. l. 5. & l. 8. eguille, lisez, aguille. f. 18. b. l. 2. laure, lisez, l'autre f. 21. b. l. 14. remettant, lisez, remettez. l. 16. angless lisez, angles. f. 25. a. l. 17. cachei, lisez, cacher. f. 35. a. au titre du liure, & subtiles, lisez, & plaifantes. f. 48. a. l. 17. faifant, lisez, faifant. f. 49. b. l. 3. au tour, lisez, autour. & l. 22. des faicts, lisez, défaits. f. 50. a. l. 14. on ne peut, lisez, on peut. l. 21. la treuuez telle, lisez, le treuuez tel. f. 53. b. l. 1. 2. d' iceluy, li. d' icelle. f. 57. b. l. 1. tour, lisez, tout. f. 61. a. l. 11. quaudran, lisez, quadran. f. 64. a. l. 6. faos, lisez, fans. & l. 5. tat able, lisez, table. f. 67. a. l. 3. bour, lisez, bout. & l. 8. encorerpa, lisez, encore par. f. 70. a. l. 17. guerre, lisez, guere. f. 75. a. l. 9. le, lisez, la. f. 76. a. l. 19. bouche, lisez, boucle. f. 77. a. l. 1. parlans, lisez, parlant. & l. 5. pendans de l'vne de ça, lisez, de l'vne, pendans de ça. f. 83. a. l. 1. antre, lisez, autre. f. 87. a. l. 1. tuot, lisez, tout. f. 86. b. l. 10. d'oubte, lisez, doute. f. 87. b. l. 22. fe, lisez, ce. f. 22. a. l. 1. sauter, lisez, passer. gobeau, lisez, goubeau. & b. l. 11. & 13. & f. 23. a. l. 7. gobeau, lisez aussi, goubeau.





TABLE DES SVBTILITEZ contenues en ceste premiere partie.

Aguille.

Pour faire tourner l'aguille d'un Quadran d'elle mesme,
sans la toucher. 63. a.

Pour faire suyure vne aguille, tout le long d'une table, sans
la toucher aucunement. 64. a.

Aneau.

Pour faire passer un aneau dans un goubeau, par un tour de
subtilité. 22. a.

Pour faire sauteler un aneau dans un verre, à mesure qu'il
vous plaira: sonnans des mains un bransle, sur le bord d'une
table. 24. b.

Pour faire passer un aneau, d'un mouchoir, dans un baston
par un traict de subtilité, qui sera treuvé merueilleux. 25. b.

Pour faire sortir un aneau de fer, hors du pan d'un man-
teau, dans lequel il sera lié, & encore tenu serré par des sons, à
plain poing, par quelqu'un. 27. a.

Comme vous sortirez un aneau, ou clé d'une corde en dou-
ble, noüée par les deux bouts, un autre la tenant dans les pources,
sans l'oster des doigts. 28. b.

Un moyen pour brider quelqu'un, avec un aneau, ou bou-
cle de laiton. 75. b.

Pour sçavoir dire en une compagnie, auquel de tous aura
esté baillé un aneau, en quel doigt il l'aura, & en quelle ioi-
sture. 83. b.

Table.

Arc.

Comment vous représenterés contre vne muraille, les couleurs, & bigarrecures de l'arc-en ciel. 36. a.

Argent.

Pour faire disparoitre vne piece d'argent, qu'on aura mise dans vne boîte : puis l'ayant faicte reuenir, la faire sembler fondüe. 54. b.

Pour faire, que mettant en deux mouchoirs, deux pieces d'argent, en chascun la sienne, (comm'il semblera,) toutes deux seront treuüees en l'vn d'iceux. 95. a.

Pour faire sauter vn sou hors d'vn bassin. 20. a.

Bléd.

Pour faire passer, par grãde subtilité, le bléd d'vn boisseau, soubz vne clochette, & le faire disparoistre incōtinēt. 62. b.

Bonté.

Pour scauoir, par maniere de plaisir, quel est le plus homme de bien de la troupe. 49. a.

Compas.

Pour faire, qu'ayant tracé avec vn compas, vne circonférence : puis fermant le compas, & derechef l'ouurant, vous remettrez les bouts d'iceluy iustement, du centre dans la mesme circonférence. 33. b.

Corde.

Pour faire sembler qu'ayez bridé quelqu'vn par l'oreille, par la ioüe, ou à trauers les leures, avec vne corde : & la faire voir tantôt coupée, & puis entiere. 73. a.

Pour faire sembler, que passiez deux cordes, à trauers le col 76. b.

Table.

Chandelle.

Pour r'alumer fort subtilement vne chandelle, après l'auoir
estaincte. 40. b.

Pour faire vne chandelle, qui fera peur, à tous ceux qui se-
ront à table. 49. a.

Choses.

Pour deuiner trois choses differentes, que trois personnes
auront prinſes, & cachées. 87. a.

Couteau.

Pour poſer trois couteaus ſur table, entrelacez d'vne façon
qu'on ne ſçaura imiter, qu'avec grand' difficulté, 11. a.

Pour faire ſauter vn couteau hors d'vn pot, ſans le toucher.
12. a.

Pour faire tourner vn couteau ſur vn' aguille. 13. a.

Pour faire, que mettant vn trenchoir ſur vn chandelier,
& vn couteau ſur le trenchoir, puis vn liard ſur le couteau, &
pouſſant le trenchoir, le liard ſe treuuera touſiours d'as le trou du
chandelier. 14. a.

Qu'il ſemblera qu'ayez auallé vn couteau, & que le rēdiés
aprez par le bas. 14. b.

Pour faire de trois pailles, neuf pieces égales, avec trois coups
de couteau ſeulement. 16. a.

Pour faire voir, & ſe perdre à meſme temps, trois petits
lopins de papier, poſez ſur vn couteau. 16. b.

Pour faire tourner vn couteau, ſans le toucher. 53. b.

Qu'il ſemblera, qu'ayez le bras, ou la gorge percée, d'vn
coup de couteau. 78. b.

Croifol.

Comme ſerés ſouſtenir vn cruſol, ſur le bout d'vn os, poſé

Table.

par l'autre bout, sur le bord d'une table.

18. b.

Dés.

Pour sçavoir dire les points, que quelqu'un aura faicts avec trois dés.

86. a.

Danse.

Pour faire danser, & tourner sur la table, des petites poupées, d'elles-mesmes.

60. a.

Pour faire danser mignonnement des marmousets, sur la peau d'un tamis, au son des sonnettes.

61. a.

Espée.

Pour faire qu'une espée, fichée par la pointe au hault d'un plancher, viendra en tombant, frapper directement du pommeau sur une noix, qu'aurez mise en terre.

33. a.

Fiole.

Pour leuer en-haut avec une paille, un gros bocal, ou fiole pleine d'eau.

21. a.

Pour faire monter l'eau, contre-mont une fiole, ou dans un verre.

36. a.

Pour faire voir dans une fiole pleine d'eau, comme la forme de villes montaignes, clochers, & autres choses.

39. b.

Filet.

Comm'un filet qu'on aura veu blanc, semblera soubdain, changé en un noir.

37. a.

Pour couper un filet, qui après sera treuvé entier.

37. b.

Pour couper un filet en plusieurs pieces, puis faire sembler, que l'ayez rejoinct tout entier.

38. b.

Pour faire voir en son entier, un filet qu'aurez bruslé à la chandelle.

31. a.

Comment un filet demeurera dans le feu, étant lié à l'é-

Table.

tour d'un œuf, sans brusler.

41. b.

Pour passer un couteau à trauers un filet, par où seront enfilez trois patenôires, sans qu'il se treuue coupé, estans les patenôires tombez à terre,

92. b.

Feu.

Pour faire voir un charbon de feu, bruslant dans l'eau, & l'en tirer puis après vif, & allumé.

65. b.

Fleur de lis.

Pour faire tourner vne fleur de lis, d'elle mesme.

62. a.

Getz.

Comment vous sçaurez dire, le nombre des getz, que trois personnes auront prins dans leurs mains.

88. b.

Pour faire, qu'ayant posé 20. getz en rond, de deux en deux, & contant de cinq en cinq, puis en leuant un, vous osterez tous les 10. de dessus.

89. b.

Pour sçauoir dire, quel de 16. getz on aura touché

90. b.

Pour sçauoir deuiner, combien de getz ou pieces d'argent quelcun aura dans ses mains.

89. a.

Globe.

Composition d'un globe de cuyure, ou laiton, qui seruira de soufflet, pour allumer le feu.

36. b.

Goubeau.

Pour faire un goubeau, dans lequel (estant plain de vin) on pourra boire : mais y meslant tant peu d'eau que ce soit, tout versera comm'on pensera boire.

23. a.

Heure.

Pour cognoistre quell'heure il est au Soleil, avec la main, six mois de l'an.

1. a.

Table.

Langue.

Comm' il semblera que vous ayez la langue percée tout ou-
tre, avec vn poinçon.

77. b.

Lanterne.

Pour faire vne lanterne, dans laquelle on verra, à la lueur
d'une chandelle, des Cheualiers, & soldatz de guerre, allans,
& venans.

51. a.

Liure.

Comm' en faulxant vn mesme liure, qu'on aura veu tout
blanc, à mesme instant vous le ferés voir peint, de diuerses, &
estranges figures.

56. b.

Lumiere.

Lumiere redant les personnes passées, cōme mortes.

49. b.

Pour faire voir de nuict, non sans éfroy, vne lumiere che-
minant par la chambre.

50. b.

Mouuement.

Pour faire vn mouuement, qui sera de fort longue durée

35. a.

Nombre.

Comme vous pourrez scauoir le nombre qu'on aura pensé.

81. b.

Vn autre moyen plus facile, & court, pour treuuer vn nō-
bre pensé.

83. a.

OEuf.

Comme vous ferez subtilement, que frappant sur vn bonnet
soubz lequel aurez mis vn œuf, il sera aprez veu tout entier.

42. a.

Pour cuire vn œuf sans feu.

42. b.

Table.

Pour faire monter vn œuf en haut, le long d'un baston.

43. a.

Pour mettre vn œuf dās vne fiole de verre, sans casser l'œuf ny la fiole.

44. a.

Pour danser, & cheminer, en portant vn œuf suspendu contre vostre face.

ibid.

Pour faire sauter, & dancer vn œuf dans vn pot, & luy faire faire plusieurs gaillardes souplesses.

45. a.

Oiseau.

Comment vous ferez rôtir, & tourner vn oiseau à la broche, de luy-mesme.

96. a.

Pierre, ou caillou,

Cōme vous rōprez vn caillou d'un coup de poing.

34. b.

Poisson.

Pour faire cuire vn poisson dans vne feuille de papier pleine d'huile, mise sur les charbons ardans.

65. a.

Pot.

Pour faire sortir tous les pois hors d'un pot.

95. b.

Pour faire soutenir vn pot sur le bout d'un petit baston, qui sera appuyé par l'autre bout, sur le bord d'une table.

21. b.

Pomme.

Pour couper vne pomme en plusieurs pieces, sans que la peau se treuve nullement entamée.

94. a.

Sonnette.

Pour faire qu'ayant mis vne sonnette en chaque main, elles se treuueront toutes deux en l'une.

93. a.

Tablettes.

Tablettes gentiles, pour mettre dedans & dehors.

67. b.

Table.

- Pour enfermer deux tablettes, ou piécettes de bois, dans vne courroye, sans qu'on les en puisse sortir. 66.a.
Autre façon d'embrouiller deux tablettes. 66.b.

Verre.

- Comm'vn plein verre d'eau ne versera point, en mettant plusieurs getz dedans. 29.b.
Pour couper vn verre à l'entour, si bien qu'il s'alongera, & raccourcira comm'vne lanterne, sans rompre. 30.a.
Pour escrire au besoing sur vn verre, sans diamant. 30.b.
Pour rompre par grand' merueille, vn baston, appuyé sur deux verres, sans les rompre nullement. 31.a.
Pour faire soutenir vn petit baston, sur le bord d'un verre. 31.b.
Lunettes de verre, qui tromperont la veüe, pour vne seule chose, en faisant voir plusieurs. 32.b.
Voyez dessus. 36.a.

Vin.

- Pour faire sembler, qu'ayez percé le front à quelqu'un, & que faciez sortir par vn petit entonnoir qu'aurez mis de contre, le vin qu'il aura beu plustost. 79.b.
Voyez encore cy-dessus. 23.a.

F I N.



